

PAULO TỠ CARTA HAN: CORINTO TÁ KE AG MỸ CARTA VÊ

¹ Paulo tỡ rá vễ. Isỹ cidade tỡ Corinto tá ke ag mỹ rán hã vễ. Kỳ ẽg rẻgre tỡ Sỏstenes vỹ inh mrẻ rán mũ gẻ. Topẻ hã ne inh kuprẻg', kỳ tóg inh jẻ prẻr, Jesus Cristo tỡ inh fẻg jẻ, sỹ tỡ ti apỏstolo jẻ jẻ sir. Hã kỳ sóg ảjag mỹ rán mũ.

² Corinto tá ảjag tóg vẻnh mản tỡ, Topẻ vỡ mẽ jẻ. Topẻ tũ vỹ tỡ ảjag nỹtỡ, ảjag tỡ tỡ Jesus Cristo mrẻ ke nỹtỡn kỳ. ảjag jẻ prẻr tóg, ảjag tỡ tỡ ti tũ nỹtỡn jẻ.

Vẻnh kar mỹ ke vẻ gẻ, vẻnh rá tag ti, ừ tỡ hẻ tá ẻg Senhor tỡ Jesus Cristo jiji tó tỡ ag mỹ. Ừ tỡ ti hả to: “ẻg Senhor vẻ,” he tỡ ag mỹ ke vẻ gẻ. Ag Senhor vẻ, kỳ tóg tỡ ẻg Senhor nỡ gẻ, Jesus ti.

³ Topẻ mỹ sóg to vỡ tỡ, ti tỡ ảjag tar han jẻ, ti tỡ ảjag krỡ kuprẻg jẻ, ẻg jóg mág ti, ẻg Senhor tỡ Jesus Cristo jóg ti.

Topẻ tỡ ẻg mỹ nẻn han mũ vỹ há nỡ

⁴ Kurả kar ki sóg ảjag to Topẻ mrẻ vỡ tỡ. Ti mỹ sóg: “há ti nỡ, ả tỡ Jesus Cristo tigrỡn ag tar han kỳ,” he tỡ.

⁵ Ti tugnỡn ảjag tóg ừn rico ag ri ke nỹtỡ, nẻn kar to mỡr, Topẻ vỡ to, vẻnh jykre há kar to. Ki kanhrỏ ảjag tóg nỹtỡ.

⁶ Cristo tỡ vẻme ki kanhrỏ ảjag tóg nỹtỡ mỡr, to tar ảjag tóg nỹtỡ.

⁷ Hã kỳ Topẻ kuprẻg tỡ ẻg mỹ nẻn nỡm tỡ ẻn vỹ tũg' he vảnh nỡgtỡ ảjag mỹ. ẻg Senhor tỡ Jesus Cristo

věnh ven mǎn ěn jǎvǎnh ājag tóg mǔgtĩ gé, ti kǎtĩg ke ti.

⁸ Ti hǎ vỹ ājag tar han mǔ', ājag tỹ ti tovǎnh tũ nĩ jé, ājag tỹ kygněg tũ nĩ jé. Kỹ ěg Senhor tỹ Jesus Cristo kǎtĩg mǎn kỹ, ti kurā ki, kỹ tóg ājag tỹ kygně ja tũ ěn venh ke mǔ sir.

⁹ Topě ne fagrĩnh mỹ vỹ vǎnh nĩgtĩ'. Ājag jé prěr tóg, ājag tỹ tỹ ti kósin tỹ Jesus Cristo mré ke nỹtĩ jé, ājag tỹ tỹ ěg Senhor mré ke nỹtĩ jé gé.

Věnh kǎpǎm kỹ nỹtĩ tũg nĩ

¹⁰ Inh kanhkǎ', věnh vỹ pir han nĩ. ěg Senhor tỹ Jesus Cristo jiji ki sóg ājag jyvěn sór mǔ, hǎ kỹ sóg ke mǔ. Věnh kǎpǎm sór tũg ra. Věnh jykre pir han sór ra. Nén pir hǎ to jykrén nĩ. Věnh jykre pir hǎ han sór ra.

¹¹ Inh kanhkǎ, ājag to sóg věnh vỹ jagy mẽ. Cloe fi mré ke fag vỹ inh mỹ tó, kỹ fag tóg inh mỹ ājag tỹ věnh kǎpǎm sór mǔ kǎmén, ājag tỹ jagně to jũ sór mǔ ti.

¹² Tag mẽ sóg, ha mẽ: ājag kǎmĩ ũ tóg něji: “tỹ sóg Paulo mré ke nĩ,” he tĩ. Kỹ ũ tóg něji: “tỹ sóg Apolo mré ke nĩ,” he tĩ gé. Jǎvo ũ tóg: “tỹ sóg Pedro mré ke nĩ,” he tĩ, kỹ ũ tóg: “tỹ sóg Cristo mré ke nĩ,” he tĩ gé.

¹³ Cristo mỹ věnh kǎpǎm kỹ nĩ'? Vó. Inh hǎ mỹ ājag jagfy cruz to sa'? Vó. Inh jyjy tó kỹ ājag mỹ věnh kygpe kỹ nỹtĩ', isỹ tỹ Paulo nĩn kỹ'? Vó, ke tũ vē.

¹⁴ Hǎ kỹ tóg inh mỹ há tĩ, ũri, sỹ ājag kygpe ja tũ nĩ ti. Tag to sóg Topě mỹ: “há ti nĩ,” he tĩ.

¹⁵ Kỹ ājag tóg iso: “ti jiji tó kỹ sóg kype kỹ nĩ,” he vǎnh nỹtĩgtĩ. Crispo hǎ kype inh, kar kỹ Gaio ti ke gé.

16 Kar kÿ sóg Estéfanas fag kygpé gé. Kar inh ù kygpég tũ nĩ, hÿn, he sóg.

17 Cristo pi(jé) inh mÿ: “ha ag kygpenh tÿg,” he ja nĩ. Inh mÿ tóg: “ha ag mÿ inh kãmén tÿg, ha inh vĩ tónh tÿg,” he ja nĩ. Kÿ sóg tó tÿgtĩ. Hã ra sóg ón kÿ tÿ vême kanhró han vãn h nÿgtĩ, ke tũ nĩ mũ ra Cristo tÿ cruz to sa ja ên tÿ nén ù tũ ri ke nĩ sir, isÿ inh vĩ kanhró tÿ ãjag krĩn sór mũ ra.

Jesus tÿ cruz to sa ja hã tó êg tĩ

18 Û mÿ êg tóg vênh kagtÿg nÿtĩ ve nĩ, êg tÿ Jesus tÿ cruz to sa mũ ên tó kÿ. Hã ra ag tÿ nÿgme ki vár ke vê. Ag jãvo tóg êg mÿ Topê tÿ há (r) nĩ, Jesus tÿ cruz to sa ti, hã kÿ êg krenkren kÿ nÿtĩ, Topê tÿ hã tugrĩn êg krenkren han kÿ.

19 Hã kÿ tóg rán kÿ nĩ, ha mẽ. “Ûn kanhró mág ag jykre tÿ sóg tũ' henh ke mũ, ha vemnĩ, ùn estudo mág ag tÿ nén to jykrén mũ tÿ sóg tũ' henh ke mũ,” he tóg, Topê ti.

20 Hã kÿ ón kÿ ùn kanhró mág ag pi(jé) tÿ nén ù nÿtĩ!. Ón kÿ vênh rán tĩ ag pi(jé) tÿ nén ù nÿtĩ!. Ón kÿ ùn estudo mág ag pi(jé) tÿ nén ù nÿtĩ!. Êg tÿ tag ki nén ù ki kanhrãn mũ to tóg: “nén ù tũ vê,” he ja nÿgtĩ, Topê ti. “Krĩ tũ ag nÿtĩ, ù tÿ tag hã nón mũ sór mũ ag,” he tóg, Topê ti.

21 Topê tÿ nén to jykrén mũ vÿ ge nĩ, ha mẽ. Êg tÿ vêsóg ki Topê to jykrén sór mũ ra êg tóg ti ki kanhrãn ja tũ nÿgtĩ, êg tÿ ga kri mũn kÿ. Hã kÿ Topê tóg êg tÿ ti vĩ jêmê kÿ kri fi kÿ êg kren han mũ. Hã kÿ tóg ag mÿ Topê krĩ tũ nĩ ve nĩ, ù tÿ ki kagtÿg ag mÿ.

²² Judeu ag ne ãg tỹ nén han vãnh ve sór mũ', milagre ti, ag tỹ Topẽ jykre ki kanhrãn jé. Kỹ fóg tỹ Grego ag ne ón kỹ ti jykre to vēmén sór mũ'.

²³ Ag jãvo ãg tóg nén pir hã tó tĩ, hã vỹ: Cristo tỹ cruz to sa kỹ ter ja ti, he mũ. Judeu ù ag mũ tóg jẽggry tĩ, ti cruz ti, jãvo tóg Judeu tũ ag mũ ãg krĩ tũ nĩ ve nĩ, ag tỹ ãg vĩ mẽ kỹ, fóg ù ag mũ, kanhgág ù ag mũ ke gé.

²⁴ Judeu kãmĩ ù ag tóg kuprẽg kỹ nỹtĩ jãvo, fóg kãmĩ ù ag tóg kuprẽg kỹ nỹtĩ gé, kanhgág ag kãmĩ ke gé. Ag hã mũ tóg há tĩ, Cristo tỹ cruz to sa kỹ ter ja ti, ùn kuprẽg kỹ nỹtĩ ag mũ. ãg hã vẽ. Topẽ jykre tar hã vẽ, Cristo tỹ cruz to sa ja ti. Topẽ krĩ há to ken hã vẽ, hã vỹ: Cristo ter ja ti, he mũ.

²⁵ Topẽ krĩ tũ nĩ ve vỹ ãprã ke krĩ há nĩ ve kãfór nĩ mũr, ti hã ne ã pir mũ krĩ há nĩ'. Kỹ Topẽ krój nĩ ve vỹ ãprã ke ag tar nĩ ve kãfór nĩ gé. Topẽ hã ne ã pir mũ tar nĩ'.

Topẽ vỹ ãg kuprẽg, ãg tỹ tỹ nén ù tũ ra

²⁶ Inh kanhkã', vẽso jykrén. Topẽ vỹ ãjag jé prẽr. ãjag kãmĩ ti pipir nỹtĩ, ùn kanhró mág ag, escola tỹ hên ri ke ki vãnh kanhrãn ja ag. ùn mág ag vỹ pipir nỹtĩ gé, ùn mág krẽ ag ke gé. ù tỹ ge kuprẽg mág tũ ti nĩgtĩ, Topẽ ti.

²⁷ ù tỹ ùn mág ag mũ krĩ tũ nĩ ve ag hã kuprẽg ti tĩ mũr, ùn vãnh kagtĩg ag. Ti tỹ ùn krĩ há ag mũ'a han sór vẽ. Kỹ tóg tag ki ùn krój nỹtĩ ag kuprẽg, ùn tar ag mũ'a han jé.

²⁸ Hã jé Topẽ tóg ù tỹ tag ki jagtar nỹtĩ ag kuprẽg. ùn mág ag tỹ ãg ve kỹ ãg tóg ag mũ jagãgtar nỹtĩ. Nén

ũ tũ vỹ tỹ ãg nỹtĩ. Hã ra Topẽ tóg ãg kuprẽg mũ, ag tỹ tũ' hen jé, ãn mág ag vỹ tỹ.

²⁹ Hã kỹ ù tóg Topẽ mỹ: “ũn mág vỹ tỹ inh nĩ, há inh nĩ,” henh ke tũ pẽ nĩ, ãg tỹ kejẽn ti ve kỹ. Hã jé Topẽ tóg ãn jagtar ag kuprẽg.

³⁰ Topẽ mré ke vỹ tỹ ãg nỹtĩ, ha mẽ, ãg tỹ tỹ Jesus Cristo mré ke nỹtĩn kỹ. Topẽ hã vỹ ãg krĩ há han mũ', Jesus tugnĩn. Topẽ hã vỹ ãg mỹ vẽn h pãte fón mũ', ti tugrĩn. Ti hã ne ãg tỹ tỹ ti tũ nỹtĩ han mũ', ti tugnĩn. Ti hã ne ãg krenkren han mũ'. Topẽ tỹ ti mỹ vẽn h jykre nĩm hã vẽ, ãg tỹ tag han jé,

³¹ ù tỹ rán kỹ nĩ tag ti, hã vỹ: “ãjag tỹ ù to: ãn mág vỹ tỹ ti nĩ, he sór kỹ ãg Senhor ti tómnĩ,” he mũ, Topẽ vỹ rán ki.

2

Paulo vỹ krój nĩ gé

¹ Inh kanhkã', ãjag ki sóg jun ja nĩ, sỹ ãjag mỹ Topẽ jykre tó jé. Inh pi(jé) ãjag mỹ ón kỹ vẽn h kanhró han'. Inh pi(jé) ãjag tỹ vẽn h vỹ ki kanhró jãvãnh tó'.

² Nén pir hã to sóg jykrén ja nĩgtĩ, sỹ ãjag mỹ tó jé, hã vỹ: Jesus Cristo, he mũ, ti tỹ cruz to sa kỹ ter ja ãn ti.

³ Krój ja inh nĩ, sỹ ãjag ki jun kỹ. Mũmẽg ja inh nĩ, kanẽ jur han ja inh nĩ, sỹ ãjag mré nĩn kỹ.

⁴ Isỹ ãjag mỹ Topẽ vỹ tó kỹ inh pi(jé) vẽn h vỹ sĩnvĩ tỹ ãjag krĩn sór ja nĩgtĩ', inh pi(jé) inh krĩ há tỹ vẽn h vỹ kanhró tó ja nĩgtĩ'. Topẽ kuprĩg tỹ inh jagrẽ nĩ hã tỹ sóg ãjag mỹ tó ja nĩgtĩ', ti jykre tar tỹ.

⁵ Hã kỹ ãjag pi(jé) ãprã ke jykre há ki ge jẽg', ãprã ke vỹ kanhró ki'. Hỹ, hã ra ãjag tóg Topẽ jykre tar ki ge jẽg mỹr'.

Topě kupřig vř Topě tř n3n to jykr3n mř ki kanhr3 nř

⁶ Jřvo s3g ř tř Jesus ki kanhr3 mág ag mř Topě vř kanhr3 t3 tř g3, ř tř to jykr3n hř ag mř. Hř ra ti pi(j3) tř 3prř ke vř kanhr3 nř'. Ga kri ke ag jykre t3 tř s3g nřgtř, řri řn mág ag vř ti. Tř' he j3 t3g ke mř, řri řn mág ag vř ti.

⁷ Topě vř kanhr3 t3 s3g tř mřr'. Ěn tř 3g v3s3g ki ki kanhrřn ke tř nř. Vřř 3g t3g ki kanhrřn ja tř nř g3. Hř ra Topě t3g vřř to jykr3n mř, mundo tř kř nř to hř t3g to jykr3n mř, 3g tř ti vř ki kanhrřn j3, 3g tř ti jykre ki kanhr3 t McGrřn tř řn mág nřtř j3.

⁸ Řri řn mág ag pi(j3) ki kanhr3 nřtř', Topě jykre tag ki'. Ag tř ki kanhr3 nřtř ra ag pi(j3) Jesus tř ka to ti sanh mř vř', 3g Senhor tř, ř tř v3nh kar křf3r nř tag tř mřr. Hř ra ag t3g ti ki kagtřg nřtřn kř ag t3g cruz to ti sa ja nřgtř.

⁹ Hř ra t3g rřn kř nř, Topě jykre ti, hř vř: "Topě t3g 3g mř n3n ř hř třvř křn ja nř, ř tř ti to hř kar mř mřr," he mř. "Ř pi(j3) tag ve ja nř ver'. Ř pi(j3) tag m3 ja nř ver'. Ěprř ke ag pi(j3) to jykr3n ja nř ver'. Topě hř ne to jykr3n ja nřgtř, ti tř 3g mř křn ke 3n to," he ja t3g nřgtř, Topě vř rřn ki.

¹⁰ Kř t3g 3g hř mř t3 ja nř. Ā kupřig tř t3g 3g kanhrřn ja nř, to. Ti kupřig vř n3n kar to jykr3n třgtř, Topě tř n3n to jykr3n mř mr3 hř, ti tř v3nh kar vatřnh tř n3n to jykr3n mř mr3 hř.

¹¹ Ge ti nř, ha m3. Ěprř ke tř n3n to jykr3n mř ki kanhr3 3g t3g nř. Kř 3g ne tř ki kanhrřn tř'? Ěg krř tř 3g ki kanhrřn tř. Ěprř ke krř vř 3prř ke tř n3n to jykr3n mř ki kanhrřn tř. Hř ra Topě kupřig vř Topě tř n3n to jykr3n mř ki kanhrřn tř. Ěprř ke

pi(jé) Topě tỹ nén to jykrén mũ ki kanhrãn tĩ', ti tỹ Topě kuprĩg tỹ jagrě tũ ra'.

¹² Hã ra Topě pi(jé) ěg mỹ ěprã ke kuprĩg tỹ ěg jagrě han'. Topě kuprĩg tỹ tóg ěg mỹ ěg jagrě han, ěg tỹ ti tỹ ěg mỹ nén nĩm mũ ki kanhró nỹtĩ jé. Ti hã vỹ ěg kren han sór mũ, ěg tỹ věnh krenkren han ki kagtĩg ra. Ti tỹ ěg mỹ nén nĩm to ken hã vē.

¹³ Hã tó sóg tĩ. Ěprã věnh kanhró pijé', sỹ ājag mỹ tó mũ tag ti. Topě kuprĩg kanhró vē. Hã kỹ sóg ti kuprĩg hã tỹ ti jykre kãmén tĩ.

¹⁴ Ěprã ke ag pi(jé) Topě kuprĩg to há nỹtĩ', ti jykre to'. Ag mỹ tóg tỹ Topě krĩ tũ nĩ ve nĩ. To jykrén há han ki kagtĩg ag nỹtĩ, ag tỹ Topě kuprĩg tỹ jagrě tũ nỹtĩn kỹ.

¹⁵ Ů tỹ ti kuprĩg tỹ jagrě jě ěn hã ne nén kar to jykrén há han tĩ'. Kỹ ũ pi(jé) ěg tỹ nén han mũ ěn ki kanhró nĩ', ti tỹ vég mũ ra, ti tỹ Topě kuprĩg tỹ jagrě tũ jě n kỹ.

¹⁶ Hỹ, ũ nỹ hỹn Topě tỹ nén to jykrén mũ ki kanhró nĩ'? Ů nỹ hỹn Topě kanhrãn mũ'? Ů tỹ ti kanhrãn mũ venh ke tũ ěg tóg nĩ. Jãvo Cristo hã ne ěg kanhrãn tĩ', ti tỹ ěg krĩ ri ke nĩn kỹ.

3

Topě camarada ag tỹ jagně ri ke

¹ Inh kanhkã', inh pi(jé) ājag mỹ Topě jykre tó kãn ja nĩ ver', sỹ ājag mỹ tó sór mũ ra. Ů tỹ Topě kuprĩg tỹ jagrě nỹtĩ tũ ri ke vỹ tỹ ājag nỹtĩ, gĩr ri ke vỹ tỹ ājag nỹtĩ, ājag tỹ Cristo jykre to tar tũ nỹtĩn kỹ.

² Hã kỹ sóg ājag mỹ leite ri ke hã ven ja nĩ, sỹ ājag mỹ Topě vĩ tó kỹ. Inh pi(jé) ājag mỹ vějě n tar ri ke ven ja nĩgtĩ', ājag tỹ to tar tũ ja nỹtĩn kỹ ver. Kỹ ājag

tóg ũri to tar tũ nýtĩ gé. Ver ãjag tóg ũ tỹ Topě kuprĩg tỹ jagrě tũ nýtĩ ve nĩ.

³ Hã kỹ ãjag tóg vėnh kãpugpóv kỹ nýtĩ, ãjag tỹ jagně to jũ nýtĩn kỹ. Hã ki ãjag tóg ěprã ke jykre han tĩ, hã ki ãjag tóg ti tỹ jagrě tũ nýtĩ ve nĩ.

⁴ Kỹ ãjag kãmĩ ũ ne tóg: “Paulo mré ke vỹ tỹ inh nĩ,” he tí'. Kỹ ũ tóg: “jãvo sóg tỹ Apolo mré ke nĩ,” he tĩ gé'. Ěprã ke jykre hã vě, ãjag tỹ han mũ tag ti.

⁵ Ũ nỹ tỹ Apolo nĩ', jo ũ nỹ tỹ inh nĩ', hã vỹ: Paulo, he mũ? Topě camarada ri ke ěg nýtĩ, kỹ ãjag tóg ěg vĩ kri fi kỹ Jesus ki ge ja nĩgtĩ, ěg Senhor tỹ ãjag krĩn kỹ. Ti hã vỹ ěg mỹ ěg rãnrãj nĩm ja nĩ.

⁶ Topě vĩ krãn inh, ãjag kãki, kỹ Apolo vỹ ki gónh, hã ra ũ tỹ ti mog han mũ vỹ tỹ Topě nĩ.

⁷ Hã kỹ ũ tỹ krãn mũ pi(jé) tỹ ũn mág nĩ'. Ũ tỹ ki gónh mũ pi(jé) tỹ ũn mág nĩ gé'. Pir ti nĩ, ũn mág ti, hã vỹ: Topě, he mũ, ũ tỹ ti mog han mũ ěn ti.

⁸ Ũ tỹ krãn mũ vỹ ũ tỹ ki gónh mũ ěn ri ke nĩ. Kanhkã tá ěg tóg ěg rãnrãj kaja venh ke mũ. Sỹ krãn ja kaja ve jé sóg ke mũ, jãvo tóg ã tỹ ki gónh ja kaja venh ke mũ gé.

⁹ Topě hã mré ěg tóg rãnrãj mũgtĩ. Topě japỹ ri ke ãjag nýtĩ.

Topě tỹ ěg rãnrãj tugnỹm ke

Kỹ ãjag tóg ti tỹ ĩn han mũ ri ke nýtĩ gé.

¹⁰ ĩn tỹ kri jě jafã ri ke han inh, ĩn króggrog ri ke ti, sỹ ãjag mỹ ti jykre tó kỹ, Topě tỹ to inh krĩn kỹ. Kỹ sóg to jykrén há han, sỹ ĩn tỹ kri jě jafã ri ke ěn tar há han jě. Kỹ ãjag kãmĩ tóg kri ĩn ri ke han mũ sir, ti tỹ isỹ ãjag kanhrãn nón ãjag kanhrãn kỹ. Kỹ ũ tỹ Topě vĩ tó mũ jé to jykrén há han.

11 Īn tỹ kri jẽ jafã ri ke ẽn vỹ pir nĩ, hã vỹ: Jesus Cristo, he mũ, hã kỹ sóg ãjag mỹ ri ke han, sỹ ti kãmén kỹ. Ủ venh ke tũ ẽg tóg nĩgtĩ.

12 Kri ẽg tóg ĩn ri ke hyn han tĩ. Ủ tóg ouro tỹ han mũ, ủ tóg prata tỹ han mũ, ủ tóg pó sĩnvĩ tỹ han mũ, ủ tóg ka tỹ han mũ, ủ tóg re tỹ han mũ, ủ tóg ẽkré fár tỹ han mũ.

13 Kurã tỹ ẽgno ki ẽg tóg venh ke mũ, ĩn há ti, hã vỹ: ẽg tỹ ủ mỹ ti vĩ kãmén há han ja ti, he mũ. Pĩ vỹ ẽg rãnrãj kókén ke mũ, kỹ ẽg tóg pĩ ki ẽg rãnrãj jykre venh ke mũ.

14 Pĩ tỹ ti kókén vãnh nĩn kỹ ẽg tóg ti kaja venh ke mũ sir, ẽg tỹ ĩn tỹ kri jẽ jafã kri han ja kaja ti.

15 Pĩ tỹ ẽg rãnrãj kókén kỹ ẽg tóg ẽg rãnrãj ti kren ke mũ sir, ti tũg kỹ, ge ra ẽg hã tóg kren ke mũ hã ra, ẽg tỹ kanhkã ra mũn kỹ. Hã ra tóg ẽg tỹ pĩ ki kren ri ke nĩ sir.

16 Ha mẽ, Topẽ ĩn ri ke ẽg nỹtĩ, Topẽ kuprĩg tỹ ẽg kãkã jẽn kỹ. Ājag mỹ tag ki kagtĩg? Ki kagtĩg nĩ ve ãjag nỹtĩ.

17 Ủ tỹ Topẽ ĩn kókén mũ ẽn kókén jé tóg ke mũ, Topẽ ti. Ti tũ vẽ mỹr, ti ĩn ti. Ājag hã vẽ, ti ĩn ti, ẽg hã vẽ.

Ēg pi(jé) jagnẽ kãfór nỹtĩ'

18 Kygnẽ tũg nĩ, ãjag tỹ vẽso: “ki kanhró mág inh nĩ,” hen kỹ. Ājag tỹ ẽprã ki kanhró mág nỹtĩn kỹ to: “nén ủ tũ vẽ,” hemnĩ, to: “sỹ nén ủ ki kagtĩg ri ke vẽ,” hemnĩ, ãjag tỹ Topẽ jykre hã ki kanhrãn jé.

19 Ẽprã ki kanhró mág ag to Topẽ tóg: “nén ủ tũ vẽ,” he tĩ. Vẽnh kagtĩg ag tóg nỹtĩ, ti mỹ. Hã kỹ tag tóg rán kỹ nĩ, ha mẽ: “ẽprã ke ag mỹ tóg ag tỹ ki

kanhró mág nýtĩ ve nĩ, hã ra Topẽ tóg hã ki ag mÿ ag krĩ tũ nýtĩ ěn ven ke mũ,” he tóg, Topẽ vĩ rá ki.

²⁰ Kÿ ti rá ũ vÿ ge nĩ gé, ha mẽ: “Topẽ vÿ ki kanhró nĩ, ũ tÿ ki kanhró mág ag tÿ nén to jykrén mũn ki. Nén ũ tũ vẽ, ag tÿ nén to jykrén mũ ti. Kÿ tóg ki kanhró nĩ, Topẽ ti,” he tóg mũ gé, Topẽ vĩ rá ki.

²¹ Hã kÿ ěprã ke jiji tó sór tũg nĩ. Ag pi(jé) tÿ ũn mág nýtĩ'. Ājag mré ke kar ag vẽ mÿr.

²² Inh hã vÿ tÿ ājag mré ke nĩ. Apolo vÿ tÿ ājag mré ke nĩ gé, Pedro ti ke gé. Mundo ki ke kar vÿ tÿ ājag tũ nĩ gé, ājag rĩnrĩr nĩ ti ke gé, ājag ter ke ti ke gé, ājag tÿ ũri vég mũ ti ke gé, ājag tÿ vãhã venh ke ti ke gé. Ājag tũ kar vẽ mÿr,

²³ jāvo ājag hã ne tÿ Cristo tũ nýtĩ', kÿ Cristo vÿ tÿ Topẽ tũ nĩ. Vyrmÿ tũ han sór tũg nĩ.

4

Apóstolo ag

¹ Ājag tÿ ěg to jykrén kÿ tag to jykren nĩ, ha mẽ. Cristo camarada vÿ tÿ ěg nýtĩ. Topẽ jykre tó ěg tóg tĩ, ěg tÿ vėsóg ki nén to jykrén vãnh ěn. Ěn ki rĩr ěg tóg tĩ.

² Kÿ ěg patrão tóg nén ũ pir ve sór nĩgtĩ, ěg tÿ ti tũ ki rĩr mũn kÿ, hã vÿ: ěg tÿ ki rĩr há han mũ, he mũ. Ge ti nĩ, Topẽ tÿ ěg ki nén ve sór mũ ti. Ti tũ ki rĩr há han jé ěg tóg ke mũ.

³ Kÿ ājag tÿ isÿ nén han mũ to vĩ mũ ra tóg inh mÿ tÿ nén ũ tũ nĩ, ěprã ke ag tÿ inh jykre to vĩ mũ ra. Kÿ isóg inh jykre to: há ti nĩ, he tũ nĩgtĩ gé.

⁴ Inh pi(jé) sÿ ti vĩ mranh mũ ki kanhró nĩ'. Hã ra sóg tag to: “hã kÿ inh jykre vÿ kuryj kar nĩ,” he

tũ nĩgtĩ gé. Topě hã ne ěg jykre tugnỹm tĩ', hã kỹ tóg ki kanhró kar nĩ, hã kỹ tóg tónh ke mũ.

⁵ Kỹ ũ jykre to vĩ sór tũg nĩ, kurã tỹ ěgno to hã, ěg Senhor kãtĩg ke to hã. Ti ha ne nén kar vėnh ven han ke mũ', ěg tỹ vėnh vatánh tá nén han mũ mré hã, ěg tỹ kuty tá nén han mũ mré hã. Kỹ tóg ěg tỹ nén ũ to jykren mũ ěn vėnh ven han kãn ke mũ gé m̃yr. Kỹ ěg tóg mėnh mũ sir, Topě tỹ ěg m̃y vĩ há han ke ti. Vyrm̃y tóg ěg m̃y tónh ke mũ, ěg kar m̃y, ěg tỹ nén han ja ti.

⁶ Inh kanhkã', Topě vĩ rán ja pãtén sór tũg nĩ. Ũ tỹ ājag kanhrãn mũ to: “Topě vĩ tó tĩ ag kãmĩ kãfór vỹ tỹ ti nĩ,” he tũg nĩ. Ājag tỹ to jykren há han jé, hã jé sóg vėnh hã to tag rán, ājag m̃y, Apolo to ke gé, ěg tỹ jagně ri ke ñytĩ tag ti.

⁷ ěg tỹ jagně kãfór han sór kỹ ěg tóg ón kỹ ke tĩ. Ha vé, Topě vỹ ěg m̃y ěg tũ vin kãn. ěg tỹ vėsóg ki mãn ja pijé'. Kỹ ājag tỹ ne jé to: “isũ vė,” he sór nẽ? Tỹ tóg Topě tỹ ājag m̃y nĩm tũ nĩ ve nĩ, ājag tỹ to: “isũ vỹ ā tũ kãfór nĩ,” hen kỹ.

⁸ Tỹ ũn há ñytĩ ve ājag ñytĩ, vėnhm̃y. Rico ñytĩ ve ājag ñytĩ, vėnhm̃y. Tỹ ũn mág ñytĩ ve ājag ñytĩ vėnhm̃y, inh jãvo. Hỹ, há ti nĩ vė, ājag tỹ tỹ ũn mág ñytĩ ra. Kỹ sóg tỹ ājag mré ũn mág ñinh mũ gé vė vė. Hã ra tóg ke tũ tĩ.

⁹ Jesus tỹ ũn fėg mũ vỹ tỹ inh nĩ, apóstolo vỹ tỹ inh nĩ. Hã ra tóg s̃y to jykren mũ ra tóg Topě tỹ is̃y ũn jykre kórég ag ri ke han nĩ ve nĩ, ũn kónėg ag ri ke, ag tỹ ũn kãgtén mũ ěn ag ri ke. Vėnh kar ne tóg isugñm tĩ', ěprã ke kar, Topě tỹ jėnė jafã ag kar ke gé, mundo tag ki ke kar ag m̃yr.

¹⁰ Krĩ tũ nĩ ve sóg nĩ m̃yr, Cristo tugrĩn. Inh jãvo

ãjag tóg krĩ há nýtĩ ve nýtĩ, Cristo jykre ki. Krój inh nĩ, jãvo ãjag tóg tar nýtĩ ve nýtĩ. ãjag to ag tóg vĩ há han tĩ, jãvo ag tóg iso é he tĩ.

¹¹ Hã kÿ sóg kókĩr mũ, ùri, kur tũ sóg nĩ gé, iso kry ag tóg mũ gé, jamã tũ sóg nĩ gé,

¹² ron sóg tĩ gé, sÿ inh rãnrãj ki ijẽn ven jẽ. Ag tÿ iso é he mũ ra sóg ag mÿ nén ù há tó tĩ, Topẽ tÿ ag mÿ han jé. Ag tÿ inh vóg kónãn kÿ sóg ag mÿ vẽn nenh tũ nĩgtĩ.

¹³ Ag tÿ iso fé fé he mũ ra sóg komẽr hã ag mÿ vĩ tĩ, ag jũ tÿ tũ' he jé. Vãfár ri ke inh nĩ, vẽn kar mÿ, ag tÿ nén fón tĩ kar ri ke inh nĩ.

¹⁴ Inh pi(jé) ãjag mÿ'a han sór mũ'. Hã ra sóg ãjag mÿ tag rán, sÿ ãjag jyvẽn jé, ãjag tÿ tÿ inh krẽ ri ke nýtĩn kÿ, sÿ ãjag to há tãvĩ nĩn kÿ.

¹⁵ Û tÿ ãjag kanhrãn sór mũ vÿ e nýtĩ, ù tÿ Cristo jykre tÿ ãjag kanhrãn sór mũ ag. Mil kãfór ag nýtĩ, hÿn. Hã ra sóg pir nĩ, sÿ ãjag panh ri ke nĩn kÿ. Isÿ ãjag mÿ Jesus Cristo kãmén kÿ sóg ãjag panh ri ke nĩ, ti tÿ sÿ ãjag hyn han ri ke nĩn kÿ.

¹⁶ Hã kÿ sóg ãjag jyvẽn mũ, ãjag tÿ sÿ nén han mũ han jé.

¹⁷ Hã jé sóg Timóteo jẽnẽ, ãjag to. Inh kósin ri ke ti nĩ, ti to inh há tãvĩ nĩ, kÿ tóg ãg Senhor jykre to tar nĩ. Ën hã vÿ ãjag mÿ tó mãn ke mũ, isÿ Jesus Cristo japry jagma tĩ ti, isÿ ti jamĩn jagma tĩ ti, isÿ igreja kar ki ke ag kanhrãn tĩ ti, emã kar mĩ hã.

¹⁸ Jãvo ãjag kãmĩ ù tóg vēsÿ ùn mág han sór mũ, iso: “kãtĩg ke tũ pẽ ti nĩ,” hen kÿ.

¹⁹⁻²⁰ Hã ra sóg kãnhmar ãjag to pasa ke kãtĩg ke mũ, ha vemnĩ, ãg Senhor tÿ: “ha tĩg,” hen kÿ. Kÿ sóg ag jykre venh ke mũ, vēsÿ ùn mág han mũ ag.

Ëg pi(jé) ù vĩ tỹ Topẽ tỹ tỹ ãg pã'i nĩ ãn vég tĩ'. Hã ra ti jykre tar hã tỹ ãg vég tĩ. Hã kỹ inh pi(jé) ag vĩ mẽ sór mũ ver'. Ag jykre tar ve sór inh mũ, ù tỹ vēsỹ ùn mág han mũ ag.

²¹ Kỹ isỹ ãjag tá jun kỹ ne nỹ hỹn ãjag mỹ há nĩnh mũ? Inh mỹ ka ma kãtĩ mũ', ãjag mrãnmrãn jé? Inh mỹ ãjag mỹ vĩ há han ke mũ', koměr hã, ãjag tỹ tỹ inh fe nỹtĩn kỹ? Ne nỹ hỹn há nĩ ãjag mỹ? Ha to jykrén.

5

Ûn prũg kónãn mũ

¹ Nén ù tóg mẽ há tĩ ãjag to, ke gé. Nén ù vẽnhmỹ han ãjag nẽji tĩ, hã ra tóg kórég pẽ nĩ, ãjag kãmĩ ù tỹ nén han mũ ti. Tag mẽ inh, ha mẽ: ãjag kãmĩ ù tóg nẽji ã panh prũ fi tỹ prũg mũ. Û tỹ Topẽ jykre ki kagtĩg ag pi(jé) ti ri ke han tĩ', ti jykre kórég tag ti'.

² Hã ra ãjag tóg to fe kaj tũ nỹtĩgtĩ. Vēsỹ ùn mág han sór ãjag tóg mũgtĩ, vẽnh jykre kórég tag tỹ ãjag kãmĩ ù kãkã nỹ ra. Æjag ne tóg vēsỹrénh tũ nỹtĩgtĩ', ãjag tỹ ù tỹ ti kórég tỹ ge han mũ ãn kutēm jé, ãjag kãmĩ.

³ Ha mẽ, ãg tỹ ti tỹ nén han ke to inh jykrén huri, sỹ ãjag mré nĩ tũ ra ver. Hã ra sóg ãjag to jykrén tĩ. Sỹ ãjag mré nĩ ri ke han sóg tĩ, sỹ ãjag mré ti to jykrén kỹ. Û tỹ vẽnh jykre pãno tỹ ge han mũ ãn tỹ tag han nĩ, ha mẽ.

⁴ Vẽnh mãn jé ãjag tóg ke mũ, jó sóg ãjag mré nĩ ri ke han mũ, ãjag vẽnh mãn ki. Æn ki ãg Senhor tỹ Jesus vỹ ãjag mỹ vẽnh jykre nĩm ke mũ. Kỹ ãjag tóg sir Jesus jyjy tó kỹ

⁵ ti fěg ke mũ, ũn jykre kórég ěn ti, Satanás mỹ, ti tỹ ti fár kókén jé. Satanás tỹ ti fár kókén kỹ tóg hěn ri ke mũn to jykrén mǎn ke mũ, kỹ ti kuprĩg vỹ kren ke mũ, ěg Senhor tỹ Jesus kurā ěn kǎ.

⁶ Ājag tỹ vĕso: “há ěg nỹtĩ,” he mũ ran pi(jé) há nĩgtĩ'. Ha mẽ, pǎo jǎgja sĩ tỹ, fermento sĩ tỹ pǎo kar tóg són ke kỹ mog tĩ. Tag to jykrén.

⁷ Hǎ kỹ fón kǎn nĩ, pǎo jǎgja si ti, ājag tỹ pǎo tǎg han jé, ũn jǎgja tũ ri ke ājag nỹtĩ, ājag jykre ti, ti há nĩn kỹ. Kỹ vĕnh jykre kórég vǎm kǎn nĩ. Cristo vỹ ěg jagfy ter mỹr. Ěg tỹ Páscoa kǎ cordeiro tǎnh tĩ ěn ri ke ti nĩ, Jesus ter ti.

⁸ Ěg tỹ festa ěn ko jé ěg tóg pǎo jǎgja si fón kǎn tĩ. Kỹ kemnĩ gé, hǎ vỹ: vĕnh jykre pǎno tovǎnh, he mũ, nén ũ vĕnhmỹ han mǎn tũg, he mũ, ājag tỹ pǎo jǎgja tũ ri ke nỹtĩ jé, hǎ vỹ: vĕnh jykre kuryj han nĩ, he mũ, vĕnh jykre pir han nĩ, he mũ gé.

⁹ Hǎ jé sóg ājag mỹ rán ja nĩ, ājag tỹ ũ tỹ nén ũ vĕnhmỹ han mũ ag mré mũ tũ nĩ jé.

¹⁰ Hǎ ra sóg ũ tỹ Jesus ki ge tũ ag tó ja tũ nĩ, isỹ: “ag mré mũ tũg nĩ,” hen kỹ. Jykre pǎno ag nỹtĩ, ěprǎ ke ag, hǎ vỹ: nén kar to én (ka)mě, he mũ, nén ũ péju tĩ he mũ vyrmỹ topě han mũ, he mũ. Ājag tỹ tag ag mré vĕmén sór tũ nĩn kỹ ājag hỹn mundo tag tovǎnh kỹ hĕ ra mũnh ke mũ. Inh pi(jé) tag tó ja nĩ'.

¹¹ Hǎ ra sóg ājag mỹ ũ tỹ ón kỹ tỹ ěg régre nĩ ěn rán mũ. Ũ tỹ: “tỹ inh ǎ mré Jesus ki rǎ kỹ nĩ,” he mũ ra nén ũ vĕnhmỹ han tovǎnh sór tũ nĩn kỹ ti mré tũg mǎn tũg nĩ, ti tỹ nén kar to én (ka)mě nĩn kỹ, ti tỹ vyrmỹ topě han kỹ, ti tỹ ũ to vĩ kónǎn (ka)mě nĩn kỹ, ti tỹ kron (ka)mě nĩn kỹ, ti tỹ nén ũ pigju(g) ti

nĩn kÿ. Û tÿ ge mré nĩ sór tũg, nĩ, ti mré jẽn tũg nĩ gé.

¹² Ëg pi(jé) ãg mré ke tũ ag jykre tugnÿm ke mũ', Jesus ki ge tũ ag. Æjag tÿ ãg mré ke ag jykre tugnÿm ke vë, ag jykre to: “tag vÿ há nĩ, tag vÿ kórég nĩ,” henh ke vë.

¹³ Topë hã ne ù ag jykre venh ke mũ', ãg mré ke tũ ag. Ëg mré ke tÿ vënh jykre pãno han kÿ ãg ti jykre tónh ke mũ. Hã kÿ ù tÿ vënh jykre kórég han mũ ãn kutëm nĩ, ãjag kãmĩ.

6

Ëg tÿ pã'i ag mÿ ãg mré Jesus ki rã kÿ nÿtĩ ù tónh ke tũ

¹ Kÿ nén ù tóg vënhmÿ tĩ gé. Æjag kãmĩ ù tóg ã mré ke to jũ kÿ Jesus mré ke tũ ag tÿ pã'i mÿ tó tĩ, pã'i ag jykre pãno ra. Ti pi(jé) Topë tũ ag mÿ tó tĩ'. Vënhmÿ ti nĩ, tag ti.

² Ëprã ke ag jykre tugnÿm jé ãjag tóg ke mũ mÿr, ãjag tÿ tÿ Topë tũ nÿtĩn kÿ. Æjag mÿ tag mẽ ja tũ? Kÿ, ãjag tÿ ga kri ke kar jykre tugnÿm ken kÿ ãjag hÿn jagnë jykre tugnÿm há han ke mũ gé, jagnë to jũ tÿ tũ' henh ke jé ãjag tóg ke mũ gé. Ki ãjag tóg krÿg mũ mÿr.

³ Topë tÿ jënë jafã ag jykre tugnÿm jé ãjag tóg ke mũ mÿr, ãjag mÿ tag mẽ ja tũ? Kÿ ãjag hÿn ãprã ke jykre tugnÿm há han ke mũ gé.

⁴ Ge ra ãjag tóg ãg mré ke tũ ag mÿ: “ha inh mÿ isũ ti vé,” he tĩ, ù tÿ ãg mré vënh mãn tĩ tũ ag mÿ, ag tÿ ga kri ãjag tũ ven jé.

⁵ Mÿ ãjag mÿ'a tũ? Ājag kãmĩ ũ mÿ kri há tũ nĩ', ti tÿ ãjag jyvĕn jé ãjag tũ to, ãjag tÿ jagnĕ tũ to jykrĕn mũ to?

⁶ Vĕnhmÿ ti nĩ, irmão tÿ irmão ũ tón kÿ, ũ tÿ Jesus ki rã kÿ nĩ tũ mÿ, ti tÿ ãjag tũ ven jé.

⁷ Ājag tÿ jagnĕ tũ to jykrĕn kónãn kÿ tóg vĕnhmÿ pĕ nĩ, ãjag tÿ to jagnĕ to jũ kÿ mÿr. Ājag tÿ ne jé ãjag tũ tovãnh sór tũ nĩ nĕ? Ājag tÿ ne jé ũ tÿ ãjag tũ mãn sór kÿ ti mÿ nenh ke nĕ? Ti hã tóg vĕnh jykre pãno han mũ, ãjag tũ mãn sór kÿ. Ge ra ti mÿ nĩm nĩ. Kÿ ã tóg Topĕ vĩ mranh tũ nĩ, inhhã, ti tigrĩn.

⁸ Hã ra ãjag tóg ti mÿ nenh sór mũ. Kÿ ãjag tóg jagnĕ tũ to vĕnh jykre kórég han tĩ gé mÿr, jagnĕ tũ mãn sór ãjag tóg mũ gé mÿr, ãjag mré ke tũ ĕn mÿr.

⁹ Ũn jykre pãno ag pi(jé) Topĕ tÿ tÿ ĕg pã'i nĩ venh ke mũ'. Ājag mÿ tag mĕ ja tũ?

Ha mĕ, ker kygnĕ hĕ'. Ũ tÿ ũn mén tũ fag mré nÿ mũ ag pi(jé) venh ke mũ', Topĕ tÿ ĕg pã'i nĩ ti. Ũ tÿ vyrmÿ topĕ han mũ ag pi(jé) venh ke mũ'. Ũ tÿ ã prũ ra ũ fi mré nÿ mũ ĕn pi(jé) venh ke mũ', ũ fi tÿ ã mén ra ũ mré nÿ kÿ fi pi(jé) venh ke mũ'. Ũn gré tÿ ũn gré ũ tÿ prũg mũ ĕn pi(jé) venh ke mũ'. Ũn gré tÿ ti tÿ prũg sór mũ mÿ nenh tũ ĕn pi(jé) venh ke mũ gé'.

¹⁰ Ũn tũ péju(g) tĩ ĕn pi(jé) venh ke mũ', ũ tÿ nĕn kar to ĕn (ka)mĕ pi(jé) venh ke mũ', ũn kron (ka)mĕ pi(jé) venh ke mũ', ũ tÿ ĕg to vĩ kónãn tĩ pi(jé) venh ke mũ', ũ tÿ ĕg vatãnh tá ĕg tũ mãg tĩ pi(jé) venh ke mũ'. Topĕ tÿ tÿ ĕg pã'i nĩ venh ke tũ ag tóg nĩ, vĕnh jykre tÿ ge han tĩ ag.

¹¹ Ājag kãmĩ ũ tóg vĕnh jykre tÿ ge han ja nĩgtĩ,

vāsỹ, hã ra ãjag tóg vẽnĥ kugpe kỹ nỹtĩ, ũri. Kykũnh kỹ ãjag tóg nỹtĩ, ěn tỹ, kỹ Topẽ tóg ãjag mỹ vẽnĥ pãte fón ja nĩ sir, ěg Senhor tỹ Jesus Cristo tugrĩn, Topẽ kuprĩg tugnĩn.

Ěg tỹ nén ũ vẽnĥmỹ han ke tũ

¹² Kỹ ãjag hỹn inh mỹ: “isỹ nén han sór mũ ěn han jé sóg ke mũ. Topẽ vỹ ge ra inh jagãgtãn ke mũ,” he sór mũ. Vó. Nén ũ tóg ěg mỹ nén ũ há han ke tũ nĩ, kỹ tóg ěg tỹ ěn han mũ ra há tũ nĩ. Ěg tỹ nén ũ han sór mũ ěn tóg han há nỹtĩnh mũ vẽn, hã ra isỹ nén ũ kórég tỹ tãn nĩn kỹ tóg inh mỹ há tũ nĩ sir.

¹³ “Vějěn vỹ tỹ ěg nug tũ nĩ, kỹ ěg nug vỹ tỹ vějěn né nĩ,” he ãjag tóg tĩ. Hỹ, hã ra Topẽ vỹ tỹ tũ' henĥ ke mũ, vějěn tỹ, ěg nug tỹ ke gé. Ěg han ja tóg nĩgtĩ, Topẽ ti. Hã ra ti pi(jé) ěg tỹ tỹ ũn mén tũ mré nỹ jafã han'. Ěg Senhor tũ vẽn, ěg, kỹ ěg Senhor vỹ tỹ ěg tãn nĩ sir.

¹⁴ Ěg Senhor rĩn mãn tóg, Topẽ ti, kỹ tóg ěg rĩn mãn ke mũ gé, ti jykre tar tỹ.

¹⁵ Kỹ ěg hã vỹ tỹ Cristo tũ nỹtĩ, ti mré ěg tóg tỹ ũn pir ri ke nỹtĩ. Ājag mỹ tag mẽ ja tũ'? Kỹ ěg tỹ Cristo tũ tỹ ũn mén tũ fi mré tỹ ũn pir ri ke han kỹ tóg vẽnĥmỹ pẽ nĩgtĩ, fi mré nỹn kỹ. Ke tũg nĩ.

¹⁶ Ha mẽ, ũ tỹ ũn mén (ka)mẽ fi mré nỹ kỹ tóg fi mré tỹ ũn pir ri ke nĩ. Hã kỹ tóg vāsỹ tó ja nĩ. “Ũn pir ri ke fag nỹtĩ, jagnẽ mré nỹtĩ fag,” he ja tóg nĩ. Ājag mỹ tag mẽ ja tũ'?

¹⁷ Fag jãvo ěg tỹ tỹ ěg Senhor mré ke nỹtĩn kỹ ěg tóg ti mré vẽnĥ kuprĩg pir ri ke nỹtĩ gé sir.

¹⁸ Ěg tỹ ũn mén tũ mré nỹ kỹ, ěg tỹ ũn prũg tũ mré nỹ kỹ ěg tóg vẽnĥ kavėnh tĩ sir, ěg tỹ Topẽ vĩ mranĥ

tag tỹ. Ęg tỹ nén ũ ũ ki Topẽ vĩ mranh kỹ Ęg tóg vãnh kavãnh tỹ ge han tũ nĩgtĩ. Hã kỹ ũn mén tũ mré nỹ tovãnh kãn nĩ, ũn prũ tũ mré nỹ tovãnh kãn nĩ gé.

¹⁹ Ęg hã vĩ Topẽ kuprĩg jo ĩn ri ke nỹtĩ. Ęg kãkã tóg jẽ nĩ, Topẽ kuprĩg ti, ti tỹ tỹ Ęg jagrẽ nĩn kỹ. Topẽ tỹ Ęg mỹ nén han hã vễ. Ājag mỹ tag mẽ ja tũ? Hã kỹ Ęg pi(jé) tỹ vãnh pã'i jẽ'. Topẽ krêm ke vĩ tỹ Ęg nỹtĩ.

²⁰ Ęg kajãm tóg mỹr, kaja e to. Hã kỹ vãnh kar mỹ Topẽ tỹ tỹ ũn há nĩ ven nĩ, ājag tỹ ti jykre kuryj han mũn kỹ.

7

Ęg tỹ prũg há han to vãnh jykre

¹ Ājag tỹ inh mỹ vãnh rán jẽnẽn kỹ ājag tóg inh mỹ ājag prũg ke ti tó ja nĩ. Ājag prũg tũ nĩn kỹ tóg há tĩ vễ.

² Hã ra tóg ājag mỹ vẽnhmỹ tĩnh mũ, kỹ tóg inh mỹ ājag tỹ ũn mén tũ fag to én ha mẽ tĩ. Hã kỹ tóg há nĩ, ũ tỹ ũn pir fi tỹ prũg kỹ, fi tỹ tỹ ti prũ pẽ nĩ jé. Ũ fi tỹ ũn pir tỹ mén kỹ tóg há tĩ gé, ti tỹ fi mén pẽ nĩ jé gé.

³ Kỹ fi mén jé fi mỹ fi tũ han, fi mré nỹ kỹ, jãvo ti prũ fi jé ti tũ han, ti mré nỹ kỹ.

⁴ Fi pi(jé) tỹ vễsũ nĩ', fi mén jẽn kỹ'. Fi mén tũ vễ sir. Kỹ ti hã vĩ ri ke nĩ gé. Ti pi(jé) tỹ vễsũ nĩ gé', ti prũ jẽn kỹ'. Fi tũ vễ, fi mén ti.

⁵ Hã kỹ jagnẽ mỹ vãnh nenh tũg nĩ. Hẽn ri ke mũn ājag kejẽn jagnẽ mré to jykrén sór mũ, ājag tỹ kuty pipir ki jagnẽ mré nỹ tũ nĩ jé, ājag tỹ Topẽ mré vēmén jé vãsãnsãn jé. Kỹ tag pãte jagnẽ mré nỹ mãn nĩ sir, Satanás tỹ ājag krĩn kónãn tũ nĩ jé. Ājag tỹ ũ mré nỹ sór kỹ tóg inh mỹ to ājag tỹ Topẽ vĩ mranh

ha mẽ tĩ, Satanás tỹ ãjag krĩn kỹ. Hã kỹ tóg ãjag tỹ kãnhmar jagnẽ mré nỹ mãn kỹn há tĩ.

⁶ Tag kar tó sóg ãjag mỹ, ãjag krój nỹtĩn kỹ. Inh pi(jé) vẽnħ kar mỹ: “ha prũg, ha mên,” he sór mũ'.

⁷ Vẽnħ kar tỹ inh ri ke nỹtĩ ra tóg inh mỹ há tĩ vẽn, isỹ prũ tũ nĩ tag ri ke. Hã ra Topẽ tóg vẽnħ kar tỹ vyrmỹ nén ù to tar han tĩ, ãg tỹ ki króm jé. Hã kỹ ù tóg ã prũ tũ to tar nĩ, jó ù tóg ã prũ fi to tar nĩ. Topẽ tỹ nén han jan hã vẽn.

⁸ Hã ra sóg ùn prũ tũ mỹ tag tó sór mũ, ha mẽ. ãjag tỹ inh prũ tũ ri ke nỹtĩ ra tóg há tĩ vẽn, kỹ ùn mên ter ja fag tỹ mên mãn tũ ra tóg há tĩ vẽn gé.

⁹ ãjag tỹ hã ra prũg sór kỹ, ãjag tỹ mên sór kỹ tóg há tĩ gé, kỹ ãjag tóg vẽnħ prũg han mũ sir. ãjag tỹ prũ tũ nĩ ra fag to én kỹn pi(jé) há nĩ', ãjag tỹ ag to én kỹ ke gé'. Hã kỹ prũg nĩ, mên nĩ ãjag tỹ ù to én tũ nĩ jé.

¹⁰ ãjag kãmĩ ù tóg prũ nỹtĩ, ù fag tóg mên nỹtĩ gé. ãg Senhor vỹ ãjag hã mỹ tag tó mũ, sỹ tónħ ke tag, ha mẽ. Isỹ tó pijé', ti tỹ tó hã nẽ', ha mẽ. ã mên fón tũg nĩ.

¹¹ ã tỹ ge ra to fón kỹ mên mãn tũg nĩ. ã tỹ mên mãn sór kỹ ã mên fón jan hã mré to jykrén, ãjag tỹ jagnẽ mré nỹtĩ mãn jé sir. Kỹ ã prũ jèn kỹ fi fón tũg nĩ gé. ãg Senhor tỹ tón hã vẽn.

¹² Jãvo inh hã tóg tag tó mũ ãjag mỹ, ha mẽ. ãg Senhor tỹ tó pijé', ha mẽ. ãjag kãmĩ ù prũ fi tóg Jesus ki rã sór tũ nĩ, fi mên tỹ tỹ Jesus mré ke nĩ ra. Fi tỹ ti mré nĩ sór nĩn kỹ tóg fi mré nĩ ha sir. Fi tovãnh sór tũg nĩ.

13 Kÿ ã mén tÿ Jesus ki rã sór tũ ra ã mré nĩ sór kÿ ti mré nĩmnĩ gé.

14 Topẽ tũ vÿ tÿ ã nĩ, ã mén tÿ ti ki rã sór tũ ra. Hã ra tóg ã mré nĩn kÿ tÿ ti tũ ri ke nĩ gé sir. Kÿ ã prũ fi tÿ Jesus ki rã sór tũ ra fi tóg tÿ Topẽ tũ ri ke nĩ gé sir, fi tÿ ã mré nĩn kÿ. Ke tũ nĩ mũ ra ãjag krẽ vÿ ti ki rã tũ krẽ ri ke nÿtĩnh mũ vë, Topẽ mũ. Hã ra ag pi(jé) ri ke nÿtĩ'. Tÿ Topẽ tũ ri ke ag nÿtĩ gé sir, ãjag krẽ ti.

15 Hën ri ke mũn ã mén, ã prũ fi ã fón sór mũ, fi tÿ Jesus ki rã sór tũ nĩn kÿ. Kÿ fi mÿ, ti mÿ: “ha tĩ ge,” hemnĩ. Topẽ vÿ ãg krĩ kuprãg sór mũ, hã jé tóg ãg kuprẽg. Hã kÿ ã pi(jé) tÿ ã mén krẽm ke nĩ', ti tÿ ã tovãnh sór kÿ, ã pi(jé) tÿ ã prũ fi krẽm ke nĩ gé', fi tÿ ã tovãnh sór kÿ, ã tÿ jesus ki rã tigrĩn.

16 Hën ri ke mũn ti kejën kren ke mũ, ã jamën kÿ, ã mén ti, hã ra ã pi(jé) ki kanhró nĩ', ti kren ke ti'. Hën ri ke mũn fi kejën kren ke mũ, ã jamën kÿ, ã prũ fi, hã ra ã pi(jé) ki kanhró nĩ', fi kren ke ti'. Hã kÿ fi tĩg kamëg tũg nĩ, fi tĩg sór kÿ, ti tĩg sór kÿ ke gé.

Ëg tÿ Topẽ jykre hã mĩ mũnh

17 Topẽ tÿ ã jykre tÿ ã kuprẽg ja ën hã mĩ tĩg nĩ, ãg Senhor tÿ ã mÿ Vënh jykre nĩm ja ën hã mĩ. Hã tó sóg tĩ, ãg mré vënh mãn tĩ kar ag mÿ.

18 Topẽ vÿ ã kuprẽg. Á tÿ tÿ Israel mré ke nĩn kÿ ã gré junun fár vÿ kym kÿ nĩgtĩ. Kÿ tóg hã tĩ. Tÿ tũ' he sór tũg nĩ. Á tÿ tÿ Israel mré ke tũ nĩn kÿ ã fár vÿ kym kÿ nĩ tũ nĩ. Kÿ tóg há tĩ gé. Kym sór tũg nĩ gé.

19 Nén ù tũ vë, ti fár kym ke ti, ti fár kym ke tũ ti ke gé. Nén pir vÿ há nĩ, hã vÿ: ãg tÿ Topẽ vĩ ki króm, he mũ, ãg tÿ ti tÿ ãg jyvën mũ han, he mũ.

20 Topě tỹ hã tỹ ã kuprëg ký vënh jykre ên hã mĩ tĩmnĩ.

21 Ājag kãmĩ ù vỹ patrão nỹtĩ. Ājag kajãm tóg, ājag patrão ti, ěg tỹ ěg mĕg kajãm ên ri ke, hã ký ājag tóg tỹ ti tũ nỹtĩ, fagrĩnh mỹ ājag tóg ti rãnrãj han ti. To krĩ kufy nỹtĩ tũg nĩ. Ājag tỹ hã ra ājag patrão tovãnh to vënh jykre há ve ký tovãnh nĩ, ti tỹ ājag tovãnh sór ký.

22 Ha vé, ěg Senhor vỹ ājag kuprëg, ājag patrão nỹtĩ ra. Ājag tỹ tỹ Cristo tũ nỹtĩn ký ājag tóg tỹ ùn patrão tũ ên ri ke nỹtĩ sir, ājag tỹ ěprã patrão krĕm nỹtĩ ra. Ký ājag patrão vỹ ge nĩ gé. Ěg Senhor tỹ ti kuprëg ký tóg tỹ ti patrão jĕ sir. Hã ký ùn patrão tũ ag vỹ Cristo ki ge ký tỹ Cristo krĕm ke nỹtĩ. jãvo ùn patrão ag vỹ Cristo tigrĩn tỹ ùn patrão tũ ên ri ke nỹtĩ gé.

23 Hỹ, ěg kygjãm ti mỹr, kaja e tỹ, Cristo ti. Hã ký ěprã ke ag krĕm nỹtĩ sór tũg nĩ, tũ nĩ mũ ra ag tóg ājag tỹ Cristo mré mũ kamĕg mũ.

24 Inh kanhkã', Topě tỹ hã tỹ ājag kuprëg ký vënh jykre ên hã mĩ mũmnĩ.

Ůn mén ja tũ fag tó vënh jykre

25 Ůn mén ja tũ fag tó ja ājag tóg nĩgtĩ inh mỹ, ājag tỹ rán ki. Hã ra ěg Senhor pí(jé) fag to nén ù tó ja nĩgtĩ'. Ký sóg to jykrén ký ājag mỹ tag tó sór mũ, ha mĕ. Ěg Senhor tóg inh jagãgtãn, ký tóg isar han, sỹ to jykrén há han jé.

26 Ký sóg ěg tỹ ti jagy vég tĩ tag to jykrén mũ. To jykrén ký tóg inh mỹ há tĩ, ājag tỹ ũri nén han mũ tag tovãnh sór tũ nĩ jé.

27 Æ mÿ prÿ jê? Kÿ fi fón sór tÿg nÿ. Æ mÿ prÿ tÿ jê? Kÿ prÿg sór tÿg nÿ gé.

28 Æ tÿ ge ra prÿg sór kÿ tóg há tÿ gé hã ra, Topê vÿ mranh ke tÿ ã tóg nÿ, prÿg kÿ. Kÿ ùn mén ja tÿ fi mén kÿ tóg há tÿ gé sir. Topê vÿ mranh pijé'. Hã ra tóg jagy tÿnh mÿ. Krÿ kufy ve jé ãjag tóg ke mÿ, tag ki, êprã, ãjag prÿg kÿ, ãjag mén kÿ ke gé. Hã ra tóg inh mÿ há tÿ vê, ãjag krÿ kufy tÿ nÿ ti.

29 Inh kanhkã', inh vÿ tag jëmê ra, ha mẽ. Kurã tÿ ãgno vÿ kãnhmar jun ke mÿ. Hã kÿ ùn mén fi jé ùn mén ja tÿ fi ri ke nÿ, ùn prÿg ja tÿ ri ke nÿ gé. Tag ki vênh jykre vê, fag tÿ jagnê mré nÿtÿg ti. Kãnhmar tóg tÿ' henh ke mÿ.

30 Hã kÿ ù tÿ tag ki fÿ mÿ jé ùn fÿ tÿ ri ke nÿ. Û tÿ tag ki mÿ sér nÿ jé ùn mÿ sér vãnh ri ke nÿ. Û tÿ nén ù comprar he mÿ jé ù tÿ nén ù comprar he tÿ ri ke nÿ.

31 Û tÿ ga kri tÿ nén ù mág nÿ ên jé ù tÿ nén ù tÿ ên ri ke nÿ. Tÿg kãn jé tóg ke mÿ, êg tÿ tag ki nén vég mÿ ti.

32 Nén ù pir tóg inh mÿ há tÿ vê, hã vÿ: ãjag krÿ kuprã kÿ nÿtÿmni, he mÿ, ãjag tÿ nén ù to krÿ kufy tÿ nÿtÿ jé.

Ûn prÿg tÿ ên vÿ êg Senhor tÿ ki rÿr tÿgtÿ, kÿ tóg: “êg Senhor mÿn mÿ há nÿ vÿ, sÿ nén han mÿ ti?” he tÿ.

33 Jãvo ùn prÿg mÿ vÿ êg tÿ tag ki nén vég tÿ ki rÿr nÿgtÿ, kÿ tóg: “inh prÿ fi mÿn mÿ há nÿ vÿ, sÿ nén han mÿ ti?” he tÿ gé.

34 Kÿ tóg êg Senhor tÿ ki rÿr tãvÿ han tÿ nÿ sir, ùn prÿ ên ti. Kÿ fi vÿ ge nÿgtÿ gé, ùn mén ter ja fi, ùn mén ja tÿ fi ke gé. Êg Senhor tÿ ki rÿr fag tóg nÿgtÿ,

fag tỹ tỹ ti tũ tãvĩ nỹtĩ jé, fag tỹ ti tũ ki króm há han jé, fag tỹ nén ù han kỹ, fag tỹ nén ù to jykrén kỹ ke gé. Ûn mén mũ fi tóg hã ra ěg tỹ tag ki nén vég tĩ ki rĩr nĩgtĩ, kỹ fi tóg: “inh mén mỹn mỹ há nĩ vỹ, sỹ nén han mũ ti?” he tĩ gé.

³⁵ Sỹ ãjag tũ to jykrén há han kỹ, hã kỹ sóg ãjag mỹ tag tó mũ. Inh pí(jé) ãjag mỹ vỹ tar han sór mũ', ãjag tỹ ti tỹ ãjag mỹ há tũ nĩ ěn han jé'. ãjag tỹ mũ há han kỹ tóg inh mỹ há tĩ, ãjag tỹ ěg Senhor tũ ki rĩr há han kỹ, nén ù tỹ ãjag kutãn tũ nĩ jé.

³⁶ Hẽn ri ke mũn ti ãjag kãmĩ ù mỹ há tũ nĩ, ti kósin fi mén tũ nĩn kỹ. Hẽn ri ke mũn tóg fi mỹ vẽnhmỹ nỹ ve nĩ, fi panh mỹ ke gé. Hẽn ri ke mũn fi sanh há nĩ ha, hẽn ri ke mũn fi jagtar ke mũ, fi mén ke tũ to. Kỹ tóg jatun mỹ fi tỹ ã tỹ nén han sór mũ ěn han mũ sir, fi panh ti. Há ti nĩ, fi mén ke ti. Topẽ vỹ mranh pijé'.

³⁷ Hẽn ri ke mũn ù tóg to jykrén há han mũ hã ra, kỹ tóg fi mén sór tũ nĩ sir. Kỹ tóg tá krỹ nĩ, ã kósin fi ki rĩr ke ti. Kỹ tóg to jykrén mãn mũ ra tóg ti mỹ há tũ, fi mén ke tũ ti. Tovãnh sór tũ ti nĩ. Kỹ tóg fi mén tũ nĩ sir. Tag vỹ há tãvĩ nĩ.

³⁸ Hã kỹ tóg ge nĩ, ha mẽ. Ti tỹ fi mén kỹ tóg há nĩ, ã kósin mén ja tũ fi. Ti tỹ fi mén tũ nĩn kỹ tóg há kãfór nĩ.

³⁹ Ûn tỹtã fag vỹ tỹ ãjag mén tũ nỹtĩ, ag rĩnrĩr nỹtĩn kỹ. Û fi mén ter kar kỹ fi hã ra ù tỹ mén sór mũ kỹ fi tóg mén mũ sir, jatun mỹ. Fi mén mãn vẽ sir, Há ti nĩ. Hã ran jé tỹ ěg Senhor mré ke nĩ, fi mén mãn ke ti.

⁴⁰ Fi tỹ mén mãn sór tũ nĩn kỹ tóg há kãfór nĩ sir, fi mỹ sér kãfór. Isỹ fag to jykrén hã vẽ. Hã ra sóg Topẽ

kuprĩg tỹ jagrẽ nĩ, hã kỹ sóg ãjag mré to jykrén há han mũ gé.

8

Vẽnh kãgrá tỹ topẽ to vẽn h jykre

¹ Kỹ sóg ãjag mũ vễjẽn tó sór mũ gé. ãjag mễg tãnh kỹ ag tóg vẽn h kãgrá tỹ topẽ mũ pũn vẽn tĩ, pũn kar kỹ ag tóg açougue ki ãjag mũ vẽn h he tĩ. Kỹ ãjag kãmĩ ù tóg: “inh mũ açougue ki mãn kỹ konh mũ vỹ?” he tĩ, hã kỹ sóg ãjag mũ kãmén sór mũ.

Hã ra ãjag kãmĩ ù tóg: “ki kanhró ẽg nỹtĩ, to tar ẽg nỹtĩ,” he tĩ. “Jatun mũ ẽg tóg konh ke mũ,” he ag tóg tĩ. Ẽg tỹ nén ù to: “ki kanhró mág inh nĩ,” hen kỹ tóg inh mũ ẽg tỹ kãnhmar ù to: “ti pi(jé) inh ri ke nĩ, ti kãfór inh nĩ,” henh ha mẽ tĩ. Ẽg tỹ jagnẽ to há nỹtĩnh ke vẽ. Ẽg tỹ jagnẽ to há nỹtĩn kỹ ẽg tóg jagnẽ mũ nén ù há tó tĩ, ẽg kar tỹ ki kanhrãn há han jé sir.

² Ẽg tỹ nén ù to: “ki kanhró sóg nĩ, ã jãvo,” hen kỹ ẽg pi(jé) ki kanhrãn há han mũ ver'.

³ Ẽg tỹ Topẽ to há nỹtĩn kỹ, kỹ tóg ẽg tỹ ti ki kanhrãn há han mũ sir Topẽ ti.

⁴ Kỹ sóg ãjag mũ vễjẽn ẽn kãmén sór mũ, ag tỹ ón kỹ vẽn h kãgrá tỹ topẽ mũ pũn tĩ ẽn ti. Nén ù tú vễ ón kỹ vẽn h kãgrá tỹ topẽ ti. Pir ti nĩ, Topẽ ti. Topẽ ù vỹ tú nĩ.

⁵ Nén ù e to ag tóg ón kỹ: “Topẽ vẽ,” he tĩ, kanhkã tãn ù ag to, ga tãn ù ag to ke gé, Ừ tỹ ge vỹ e nỹtĩ, topẽ tỹ ge ti, Senhor tỹ ge ti.

⁶ Hã ta tóg ẽg mũ pir nĩ, Topẽ ti, ẽg jóg mág ti, ag jãvo. Nén kar han ja ti nĩgtĩ mỹr vẽn h mũ, kỹ ẽg tóg ti hã ve sór mũ gé sir. Pir ti nĩ gé, ẽg Senhor ti, hã

vỹ: Jesus Cristo, he mũ. Nén ù kar vỹ nỹtĩ ti tugrĩn, kỹ ẽg ti tugnĩn krenkren ke mũ gé.

⁷ Hã ra ẽg kãmĩ ù ag tóg tag ki kagtĩg nỹtĩ ver. Tãg ti nĩ ver, ãjag tỹ ón kỹ vẽn kãggrá tỹ topẽ tovãnh mũ ti, kỹ tóg ver ag mỹ e tĩ. Hã kỹ ón kỹ vẽn kãggrá tỹ topẽ mỹ vễjẽn pũn ja ẽn tóg tỹ vẽn kãggrá tỹ topẽ ẽn tũ nĩ nễji ag mỹ. Kỹ tóg ag tũ vễjẽn ẽn ko kỹ tóg ag tỹ vẽn kãggrá tỹ topẽ ẽn tũ ko ri ke nĩ sir ag mỹ. Kỹ tóg ag mỹ há tũ tĩ sir, ag tỹ tag to krój nỹtĩn kỹ ver. Kỹ tóg ag mỹ ag tỹ vễjẽn to vẽn kavẽn ha mẽ tĩ.

⁸ Ẽg pi(jé) vễjẽn tugrĩn Topẽ to há nỹtĩ', ti to kórég nỹtĩ'. Ẽg tỹ ko tũ (hã) ra nén ù tũ vễ gé, vẽn kãggrá tỹ Topẽ mỹ pũn ja ẽn ti. Vễjẽn vẽ mỹr.

⁹ Nén ù kar vỹ tỹ ẽg tũ nĩ.

Hã ra ùn krój tóg hẽn ri ke mũn Topẽ vĩ mranh ke mũ, ẽg tugrĩn, ti tỹ ẽg tỹ ti mỹ nén ù vẽnhmỹ to tar nỹtĩ nĩ ve nĩn kỹ. Kỹ tag han sór tũg nĩ.

¹⁰ Ve ra ha. Tar ã tóg nĩ, ki kanhró ã tóg nĩ, vẽn kãggrá tỹ topẽ vỹ tỹ nén ù tũ nĩ ã mỹ. Hã kỹ ã tóg ti jo ãn krẽm rã kỹ ko mũ sir, ti festa ti, ã mré ke ù tỹ ti mỹ festa han kỹ. Nén ù tũ vễ vễ. ã tỹ ti festa ko mũ ti. Hã ra ẽg mré Jesus ki rã kỹ jẽ ù tóg tag to krój nĩ ver, kỹ tóg tá ã vэг mũ sir, ã tỹ ti festa ko mũ ẽn kã. Kỹ tóg ã ve kỹ to jykrén mũ sir, ti festa ko sór jé, vẽn kãggrá tỹ topẽ mỹ festa ẽn, ti mỹ pũn ja ẽn ti. Hã ra vẽn kãggrá tỹ topẽ tóg ti mỹ tar nĩ, ùn krój mỹ, ti tỹ Jesus ki rã kỹ nĩ (hã) ra.

¹¹ Kỹ tóg ã tỹ ko mũ tugrĩn vãfor ke mũ sir, ùn krój nĩ ti. Ti jãvo ã tóg ki kanhró nĩ, hã ra tóg ã tugnĩn tũ' henh ke mũ, ùn krój nĩ ti. Hã ra Cristo tóg ti jagfy ter ja nĩgtĩ.

¹² Æ tỹ ti vĩ mranh hã vễ sir, ã régre krój ẽn to. Ti vóg kónãn ã tóg mũ sir, ti krój nãn kỹ. Hã ki ã tóg Cristo vĩ mranh mũ sir, mỹr, ha mẽ.

¹³ Hã kỹ sóg tag han sór tũ nĩ. Inh irmão tỹ isỹ nén ù nĩ ko to Topẽ vĩ mranh kỹ sóg nén ù nĩ ko sór mãn ke tũ nĩ ha, ón kỹ vễnh kãggrá tỹ topẽ mỹ pũn ja ẽn ti, ti tỹ mranh tũ nĩ jé sir, isugrĩn.

9

Paulo tỹ jãnkamy ve sór tũ

¹ Isỹ nén han mũ ve ra. Æprã ke ag tỹ inh mỹ nén tó mũ ẽn han sór tũ inh nĩgtĩ. Jesus hã vĩ inh fẽg, isỹ tỹ apóstolo jẽ jé. Ti ve inh mỹr, ẽg Senhor tỹ Jesus ti. Kỹ ãjag vĩ isugnĩn ẽg Senhor ki ge jẽg. Inh rãnrãj kaja vĩ tỹ ãjag nỹtĩ.

² Hẽn ri ke mũn sóg ù mỹ tỹ apóstolo tũ nĩ. Æjag hã mỹ sóg tỹ apóstolo jẽ mỹr, ãjag tỹ inh vĩ mẽ tugrĩn ti ki ge kỹ. Hã ki tóg ve há tĩ, ẽg Senhor tỹ inh fẽg ja ti.

³ Kỹ ù tỹ kejẽn inh kato vĩ sór mũ mỹ sóg tag tó tĩ, ha mẽ.

⁴⁻⁵ Jesus tỹ ùn vin mũ ù ag ri ke inh nĩ, apóstolo ù ag ri ke, ù tỹ Jesus mré pygfa mũ ag ri ke, Pedro ri ke ke gé, isỹ vễjẽn to, inh prũ tũ to ag jykre han tũ ra. Æjag prũ fag pére ag mũ tĩ, ag tỹ hẽn ra mũn kỹ. Isỹ ag ri ke ù tỹ Jesus ki rã kỹ jẽ ù fi tỹ prũg sór mũ ra sóg fi pére tĩg ke mũ vễ gé, hã ra sóg ke sór tũ nĩ. Kỹ ag tóg ãjag jẽn ko tĩ, ag tỹ ãjag mỹ Topẽ vĩ tó to. Isỹ ag ri kén ãjag jẽn ko sór mũ ra sóg konh ke mũ vễ gé, hã ra sóg ko sór tũ nĩ.

⁶ Inh nĩgé rãnrãj ja kaja hã ko sór inh tĩ, Barnabé ti ke gé. Æg tỹ Topẽ vĩ tó tĩ ù ag ri kén ẽg nĩgé rãnrãj

tovãnh sór mũ ra ãg tóg tovãnh ke mũ vễ, hã ra ãg tóg rãnhrãj sór mũ.

⁷ ãg tỹ Topẽ tỹ ãg mỹ vễnh rãnhrãj nĩm kaja venh ken kỹ tóg há tĩ vễ. Soldado jykre ri ke ti nĩ. Ag pi(jé) ãjag tũ ko tĩ', ag tỹ vễnh génh han kỹ, soldado ag. ãjag vễnh génh hã to ag tóg vễjẽn vég tĩ. Kỹ ù tỹ uva ki rĩr tĩ vỹ ti kanẽ ko tĩ gé. Kỹ ù tỹ ovelha ki rĩr tĩ vỹ fi leite kron tĩ gé. Hã kỹ tóg ãg tỹ Topẽ vĩ tó to ganho ve sór mũ ra tóg há tĩ vễ, hã ra ãg tóg ve sór tũ nĩ.

⁸ ãprã ke jykre ki ãg tóg ãg rãnhrãj pẽ to ãg jẽn vég tĩ. Kỹ Topẽ vĩ tag tó ja nĩgtĩ.

⁹ Moisés vĩ tag rán ja nĩ, ha mẽ. “Monh tỹ ãkré jãnkre ki rãnhrãj kỹ ti jẽnky tógfin tũg nĩ, ti jẽn kamẽg tũg nĩ,” he ja ti nĩ, Topẽ vĩ rá ki. Topẽ mỹ monh hã to jykren kỹ tag tó ja nĩ? Vó.

¹⁰ ãg to jykren hã kỹ tóg tag tó ja nĩ. ãg hã to tóg rán kỹ nĩ, ãg tỹ ãg rãnhrãj to ãg jẽn ve jé. Hã kỹ ù tỹ ãpỹ ki rãnhrãj mũ tóg to nén ù ve sór mũ, hã jé tóg rãnhrãj jẽ nĩ. ù tỹ jãnkreg mũ vĩ to nén ù ve sór mũ gé, ã rãnhrãj to.

¹¹ Isỹ ãjag mỹ kanhkã jykre tó kỹ tóg sỹ nén ù krãn ri ke nĩ, kỹ sỹ ãjag ki nén ù ve sór mũ ra tóg há tĩ vễ, ijẽn jé, hã ra sóg ve sór tũ nĩ.

¹² ù ag tóg ãjag jẽn vég tĩ, Topẽ vĩ to. Kỹ tóg sỹ ag ri kén ãjag ki jãnkamy ve sór mũ ra há tĩ vễ, sỹ ãjag mỹ Topẽ vĩ tó vén kỹ. Hã ra sóg ãjag jẽn ve sór tũ nĩ. Inh jagtar ra tóg inh mỹ tỹ nén ù tũ nĩ, ù tỹ isugrĩn Cristo kãme sér kato vĩ tũ nĩ jé, sỹ ti kaja ve tugnĩn Jesus to kórég tũ nĩ jé. Hã kỹ sóg ve sór tũ nĩ.

¹³ ù tỹ Topẽ ãn krẽm ti tũ ki rĩr tĩ ag vĩ tá ãjag jẽn vég tĩ gé, ag tỹ Topẽ mỹ nén vin tĩ ãn tỹ. Kỹ ù tỹ Topẽ

mỹ nén ù pũn tĩ ên vỹ ti ke ko tĩ gé. ãjag mỹ tag mẽ ja tũ?

¹⁴ Hã kỹ êg Senhor vỹ tag tó ja nĩgtĩ gé, hã vỹ: “ũ tỹ ti kãmén mũ ên vỹ tag to ãjag jẽn venh ke mũ,” he mũ.

¹⁵ Hã ra sóg ãjag jẽn ve sór ja tũ nĩ. Kỹ sóg ve sór tũ nĩ gé, ùri, hã kỹ sóg ãjag mỹ rán mũ. Isỹ ijẽn to inh nĩgé tỹ rãnrãj mũ hã to sóg tỹ ùn mág nĩnh mũ, kanhkã tá. Kỹ sóg tỹ tũ' he sór tũ nĩgtĩ. Iser jé tóg inh mỹ há tĩ, ù tỹ inh mỹ Topẽ vĩ kajãm sór mũ (hã) ra.

¹⁶ Jesus kãmén sóg tĩ. Inh rãnrãj hã vễ. Ti hã tóg inh mỹ tó, sỹ ti kãmén jé. Kỹ sóg ti tó tugrĩn tỹ ùn mág nĩnh ke tũ nĩ. Isỹ ti kãmén sór tũ ra Topẽ tóg inh vóg kónãn ke mũ vễ, isỹ inh rãnrãj han tũ nĩn kỹ.

¹⁷ Topẽ tỹ inh mỹ: “ha kãmén,” he tũ nĩ ra sóg kanhkã tá to ganho venh ke vễ vễ, sỹ ti kãmén tĩ ti to. Hã ra tóg inh mỹ: “ha kãmén,” he ja nĩ, kỹ tóg sỹ ti rãnrãj ki rĩr há han mũ ve sór mũ sir inh ki, Topẽ ti.

¹⁸ Kỹ sóg kanhkã tá to ganho venh ke tũ nĩ, inh rãnrãj ja to. Hã ra sóg ganho ve sór mũ tá. Hã kỹ sóg êprã ke ag ki sỹ nén ve sór mũ ên ve sór tũ nĩ, ijẽn jé. ãjag tỹ inh mỹ nén vin ke ti ve sór tũ inh nĩ. Véké sóg ãjag mỹ tó tĩ, Topẽ vĩ ti, vễnh kar mỹ ke gé. ãjag tỹ inh mỹ kajãm tũ ra tóg inh mỹ há tĩ. Kỹ sóg tag hã to kanhkã tá inh ganho ti venh ke mũ.

Ủn e tỹ Jesus ki ge kỹ tóg Paulo mỹ há tĩ

¹⁹ Ủ pi(jé) inh kri ke nĩ!. Ge ra sóg vễsỹ vễnh kar krẽm ke han, vễnh kar tỹ inh patrão ri ke nỹtĩ jé. “Hẽn ri ke mũn ù tóg Jesus ki rã sór mũ, isỹ tỹ ti

krēm ke nĩn kŷ,” he sóg tĩ. Hã jé sóg vēsŷ ag krēm ke han tĩ, ũ tŷ ti ki ge mũ ag e nŷtĩ jé, isugrĩn.

²⁰ Judeu ag tugnĩn sóg vēsŷ Judeu han tĩ, Judeu ag tŷ Jesus ki ge jé. Isŷ ag jykre han sór tũ ra inh han ke tũ nĩ vĕ, hã ra sóg han sór tĩ, isŷ ag to há nĩn kŷ. Kŷ sóg Judeu jykre han mũ ag tigrĩn ag jykre han tĩ, ũ tŷ ag jykre han mũ ag tŷ Jesus ki ge jé, isugnĩn.

²¹ Kŷ fóg ag vŷ Judeu jykre han tũ nĩgtĩ, kanhgág ag ke gé. Kŷ sóg fóg ag tigrĩn fóg jykre han tĩ, kanhgág ag tugnĩn sóg kanhgág jykre han tĩ, ag tŷ isugrĩn Jesus ki ge jé. Inh pi(jé) Topĕ jykre tovānh mũ hã ra'. Cristo jykre han sóg tũgtĩ mŷr. Judeu jykre hã tovānh inh tĩ, fóg to, kanhgág to ke gé.

²² Kŷ sóg ũn krój ag mŷ komĕr hã vĩ tĩ, ag tŷ isugnĩn Jesus to vāsānsān mǎn jé. Isŷ ũn jykre ve kŷ sóg ti jykre ri ke han tĩ, ag tŷ Jesus ki ge jé, isugrĩn.

²³ Tag kar han sóg tĩ, Jesus kǎme tugnĩn, isŷ ti mré ti rǎnhrāj ki rĩr jé.

²⁴ Ha mẽ, ũn e tóg corridida han tĩ, hã ra ũn pir tóg ganhar ke tĩ inhhã. Ag ri ke han nĩ. Vāsān ra, ājag tŷ ganhar ken jé, Jesus tŷ ĕg mŷ nĕn ven ke ti.

²⁵ Ha vé, ũ tŷ torneio han tĩ ag vŷ to jykrĕn mág tĩ, kŷ ag vǎkrĕg tĩ gé, ag tŷ ganhar ken jé. Ĕprǎ jykre ki ag tóg ganhar ke sór tĩ, hã jé ag vǎkrĕg tĩ, ti tŷ kǎnhmar tũ' he mũ ra, ag ganho ti. Hã ra ĕg tóg kanhkǎ tá ĕg ganho venh ke mũ, ũ tŷ tũg ke vānh ĕn ti.

²⁶ Ge sóg tĩ gé, sŷ corridida ri ke han kŷ. Pĕtĕm sór inh nĩ, to krónh ke tũ sóg nĩ. Rǎrá ri ke han sóg tĩ to. Inh pi(jé) véké rǎrá tĩ'.

²⁷ Vĕnh hã to rá sóg tĩ, kŷ sóg isŷ nĕn to ĕn mũ ĕn han ke tũ nĩ. Inh mŷ Topĕ tŷ inh fón ha mẽ tóg tĩ,

isỹ ãjag jyvën kar kÿ vënh jykre pãno han kÿ. Hã kÿ sóg vëso rá tí, sÿ han tÿg jé.

10

Ëg jo ke ag to jykrén nĩ

¹ Inh kanhkã', tag jëmë ra, ãjag tÿ ki kanhrãn jé. Ëg jóg'jóg ve ag vÿ Moisés mré mÿ ja nĩgtĩ. Kanhkã góg ên krëm ag tóg mÿ kãn ja nĩgtĩ, kÿ ag tóg goj kusÿg nig ên kafã ra pa kãn ja nĩgtĩ gé.

² Ëg vënh kygpe ri ken hã vë, ag tÿ kanhkã góg krëm mÿ ja ti, ag tÿ goj kusÿg nig kafã ra pa ja ti ke gé. Ên kã Moisés vÿ ag jãmĩ tĩg ja nĩgtĩ, Jesus tÿ ãg ki rĩr nĩ tag ri ke.

³ Kÿ ãg jóg'jóg ve ag tóg kanhkã tá vëjën ko kãn ja nĩgtĩ gé,

⁴ kanhkã tá goj tÿ ãganë ki kronkron kãn ja ag tóg nĩgtĩ gé, kanhkã tá goj tÿ vënh kanë ti. Pãró tá ag tóg goj ve ja nĩgtĩ, hã ra tóg tÿ kanhkã tá ke nĩ ja nĩgtĩ. Cristo to ken hã vë. Ti hã vÿ ag mré tĩ ja nĩgtĩ. Kÿ tóg ag mÿ goj ên ven ja nĩgtĩ.

⁵ Ge ra Topë tóg ãg jóg'jóg ve ag to jÿ kãn ja nĩgtĩ, kÿ ag tóg kãgter kãn ja nĩgtĩ, ga kórég ên tá. Hã ra tóg ùn pipir ag hã to há ja nĩgtĩ, Topë ti, kÿ ag hã tóg krenkren ja nĩgtĩ, ùn pipir ên ag.

⁶ Hã ra tóg rán kÿ nĩ, ãg tÿ tÿ vënh kanhrãn jé, ãg tÿ nén ù kórég to én tũ nĩ jé. To én ja ag tóg nĩgtĩ, ãg jóg'jóg ve ag, kÿ ãg tag han ke tũ nĩ.

⁷ Hã kÿ ón kÿ vënh kãggrá tÿ topë nón mÿ sór tÿg nĩ. Tag han ja ag tóg nĩgtĩ gé, ãg jóg'jóg ve ag. Hã kÿ tag tóg rán kÿ nĩ, hã mē. “Povo kar vÿ nĩgnĩ mÿ sir, ag tÿ vënh kãggrá tÿ topë to festa ko jé, ag kronkron jé sir, ag tÿ kar kÿ vënh gringrén jé fag mré,” he ja

tóg nĩgtĩ, Topě vĩ rán ki. Hã to Topě tóg ag to jũ ja nĩgtĩ gé.

⁸ Kĩ ěg ũn mén tũ fag mré n̄nh ke tũ nĩ gé. Tag han ja ag tóg nĩgtĩ gé, ěg jóg'jóg ve ag, kĩ kurã pir ki ũ t̄ 23 mil (ke) ag vỹ kãgter ja nĩgtĩ, Topě t̄ ag tũg kĩ.

⁹ Kĩ ěg Topě to: “ti h̄n iso jũnh ke tũ nĩ, s̄y ti vĩ mranh mũ ra,” henh ke tũ nĩ gé. Ke ja ag tóg nĩgtĩ gé, ěg jóg'jóg ve ag, kĩ p̄n tóg ag kãgtén ja nĩgtĩ, Topě t̄ ag to jũn kĩ.

¹⁰ Kĩ ěg Topě to vĩ kónãn ke tũ nĩ gé. Ke ja ag tóg nĩgtĩ gé, ěg jóg'jóg ve ag, kĩ Topě t̄ jēnē jafã tóg ag kãgtén ja nĩgtĩ.

¹¹ Hã ra Topě tóg ag vóg kónãn, ěg t̄ ag to vēnh kanhrãn jé. Hã jé tóg rán kĩ nĩ gé, ti t̄ to ěg jyvēn jé. ěg hã m̄n kakó nĩ, kurã t̄ ěgno ti.

¹² Hã kĩ vēso jykrén. Ā t̄g há han kĩ, ā t̄ ti vĩ mranh tũg kĩ tóg há tĩ. Hã jé vēnh ki rĩr, ā t̄ prãnh ke tũ nĩ jé.

¹³ Nén-Kórég vỹ ěg krĩn sór mũ, ěg t̄ Topě vĩ mranh jé. Hã ra tóg ěprã ke jykre ki ěg krĩn sór t̄gtĩ, Japo ti. Kĩ Topě tóg ti vég tĩ, kĩ tóg ěg ki rĩr tĩ. Kĩ tóg kejēn ti m̄y: “gen kĩ,” he tĩ sir, ti t̄ ěg kutãn tãvĩ han mũ ra ěg t̄ hē ri ke tũ nĩ jé. Kĩ tóg ěg tar han ke mũ gé, ěg t̄ Nén-Kórég t̄ ěg krĩn kónãn mũ ra ti kato tē jé, ěg t̄ ti m̄y: “hej,” he tũ nĩ jé.

Vēnh kãggrá t̄ topě jykre han sór tũg nĩ

¹⁴ Inh krē', tag tigrĩn vēnh kãggrá t̄ topě tovãnh pē han nĩ, ve sór tũg nĩ.

¹⁵ Ki kanhró ãjag tóg n̄tĩ, hã kĩ ěg t̄ Jesus jamĩ ko tĩ ěn to jykrén nĩ, ha mē.

16 Ëg tỹ Cristo ter ja mĩ ãkrén kỹ ãg tóg kron tĩ, ti kyvénh ri ke ãn ti. Copa ãn to Jesus tóg Topẽ mré vĩ há han ja nĩgtĩ, ag tỹ kron jé. Kỹ ãg tóg to Topẽ mré vĩ kar kỹ kron tĩ sir. Ëg tỹ kron kỹ ãg tóg tỹ ti mré ke nỹtĩ sir, ãg tỹ ti kyvénh ri ke ãn kron kỹ. Kỹ ti jamĩ vỹ ge nĩgtĩ gé. Kupãn kỹ ãg tóg ko tĩ, Cristo tỹ ãg mỹ tón kỹ. Ëg tỹ kon kỹ ãg tóg tỹ ti mré ke nỹtĩ gé sir, ãg tỹ ti nĩ ri ke ãn kon kỹ.

17 Ti jamĩ vỹ pir nĩ, kỹ ãg tóg ko kãn kỹ ãg tóg tỹ ãn pir nỹtĩ gé, ti mré, ãg e hã ra. Jesus jamĩ ko to vãnh jykre hã vẽ.

18 Kỹ povo tỹ Israel ag to jykrén nĩ gé, ha mẽ, Israel kré ag to. Topẽ mỹ ag tóg nén ù pũn tĩ, ti pũn jafã kri. Pũn kỹ ag tóg ko tĩ gé. Ag tỹ kon kỹ ag tóg tỹ ag tỹ ãn mỹ pũn mũ ãn mré ke nỹtĩ gé sir, ãg tỹ tỹ Jesus mré ke nỹtĩ ri ke.

19-20 Kỹ ón kỹ vãnh kãggrá tỹ topẽ to jykrén nĩ gé, ha mẽ. Ag tỹ vãnh kãggrá tỹ topẽ mỹ nén ù pũn kỹ ag tóg Nén-Kórég ag hã mỹ pũn tĩ. Ag pi (jé) Topẽ pẽ mỹ pũn tĩ!. Hã kỹ tóg inh mỹ há tũ nĩ, ãjag tỹ tỹ Nén-Kórég ag mré ke nỹtĩn kỹ, ãjag tỹ ag tũ kon kỹ ke gé.

Inh pi(jé) ãjag mỹ: “vãnh kãggrá tỹ topẽ vỹ nỹgtĩ, kỹ ag tỹ ag mỹ pũn mũ ãn vỹ tỹ nén ù nĩ,” he sór tĩ!. Nén ù tũ vẽ, Topẽ tũ vẽ, ón kỹ vãnh kãggrá tỹ topẽ ti.

21 Hã ra tóg vãnhmỹ nĩ, ãjag tỹ ãg Senhor tỹ copa ki ke kron kar kỹ Nén-Kórég tỹ copa ki ke kron kỹ ke gé. Vãnhmỹ ti nĩ, ãjag tỹ ãg Senhor jẽn ko kar Nén-Kórég ag jẽn kon kỹ ke gé.

22 Ëg tỹ Nén-Kórég ag tũ kon kỹ ti hẽn ri ke mũn ãg to jũnh ke mũ, ãg Senhor ti. Tĩ tỹ ãg to jũ nĩn kỹ

tóg vėnhmỹ nĩ. Ęg pi(jé) ti tỹ hẽ ri kenh mũ'. Hã kỹ ón kỹ vėnh kaggrá tỹ topẽ ve sór tũg nĩ.

Ęg régre tugrĩn Ęg kejẽn konh ke tũ nĩ

²³ Hã ra ãjag tóg inh mẽ: “isỹ nén han sór mũ ẽn han jé sóg ke mũ, pi(jé) kórég nĩ,” he sór mũ. Há ti nĩ vė, tag ti. Hã ra Ęg tỹ nén han mũ ù tóg Ęg mẽ nén ù há han tũ nĩgtĩ. Nén ù kar han há Ęg tóg tĩ vė, hã ra Ęg tỹ nén han mũ ù tóg Ęg tar han ke tũ nĩ, Jesus to.

²⁴ Kỹ ã tũ to jykrén tãvĩ han tũg nĩ, ã régre tũ to jykrén nĩ gé, ti mẽ há nĩ jé, ha mẽ.

²⁵ Kỹ ã tỹ nén ù tãnh jafã ki nén ù nĩ kajãm sór nĩn kỹn há tĩ, kỹ ag mẽ: “ũ mẽ ón kỹ vėnh kãggrá tỹ topẽ mẽ ti nĩ tag pũn ja tũ?” he tũg nĩ. Jẽmẽ tũg nĩ, jatun mẽ komnĩ.

²⁶ Topẽ tũ vė, ga ti, ga kri ke kar ti ke gé, hã kỹ jatun mẽ komnĩ.

²⁷ Kejẽn ù tỹ Jesus ki rã tũ ù vỹ ã mẽ: “inh mré jẽn kãtĩg,” he mũ sir. Ā tĩg sór kỹ ã tóg tĩg mũ, kỹ ã tóg nén ù kar konh ke mũ. Ti ki jẽmẽ tũg nĩ, ù tỹ hẽn ri ke mũn ón kỹ vėnh kãggrá tỹ topẽ mẽ nén ù pũn ja ti, ã tỹ jatun mẽ ko jé.

²⁸ Hẽn ri ke mũn ù tóg sir ã mẽ: “vějẽn tag ù pũn ag, ón kỹ vėnh kãggrá tỹ topẽ mẽ,” he mũ. Kỹ ko tũg nĩ sir, ti tugrĩn, ù tỹ ã mẽ tó mũ tugnĩn, ti tỹ ã to jykrén kónãn tũ nĩ jé.

²⁹ Ā pi(jé) to jykrén mũ vė', hã ra ti hã tóg to jykrén mũ, hã kỹ tóg ã mẽ tó mũ. Há tũ ti nĩ inh mẽ, ù tỹ iso jykrén kónãn kỹ, isỹ nén ù tỹ inh mẽ kórég tũ han to.

³⁰ Topẽ mẽ sóg vėjẽn ẽn to vĩ há han ja nĩgtĩ. Kỹ ù tỹ tag to iso vĩ vĩ he mũ ra tóg inh mẽ kórég nĩ, sỹ

Topê mÿ vî há han ja ên to. Hã kÿ sóg ko sór tũ nĩ, ù tÿ iso jykrén kónãn sór kÿ.

³¹ Hã kÿ Topê hã mÿ nén kar han nĩ, vènh kar tÿ Topê jykre há nĩ ve jé. ã jèn kÿ ti jykre ki jèn nĩ. ã kron kÿ ti jykre ki kron nĩ. ã tÿ nén ù han kÿ ti jykre hã ki han nĩ gé, vènh kar tÿ ti jykre há nĩ ve jé.

³² Û tÿ ã tigrĩn Topê to jũ tũ nĩ jén há tĩ, Judeu ag, fóg ag, kanhgág ag, Topê tũ ag ke gé, ù tÿ êg mré ke ag. Kÿ vènh jykre há hã han nĩ.

³³ Ke sóg tĩ gé. Vãsãn sóg tĩ, vènh kar tÿ iso há nÿtĩ jé. Hã jé sóg isũ ki rĩr tãvĩ han tũ nĩgtĩ. Vènh kar tũ ki rĩr inh tĩ, ag tÿ Jesus ki ge jé.

11

¹ Inh jykre han sórmnĩ, isÿ Jesus jykre han ri ke.

Ûn tÿtá fag jykre

² Hÿ, ãjag mÿ sóg vî há han sór mũ mÿr. Isÿ ãjag mÿ nén tó mũ ên to jykrén kãn ãjag tóg mũgtĩ mÿr'. Isÿ ãjag kanhrãn ên ki króm sór ãjag tóg tĩ.

³ Hã kÿ sóg nén ù ki ãjag kanhrãn sór mũ sir, ha mẽ. Cristo vÿ tÿ ag kri ke nĩ, kÿ ag vÿ tÿ ãjag prũ fag kri ke nÿtĩ, kÿ Topê vÿ tÿ Cristo kri ke nĩ gé.

⁴ Kÿ ag kãmĩ ù tÿ kur tÿ vènh kri fón kÿ Topê mré vî kÿ tóg há tũ nĩ, ti tÿ kur tÿ vènh kri fón kÿ jèn kÿ Topê vî tón kÿ. Ti mÿ'ãg vè sir.

⁵ Ûn tÿtá fag tÿ hã ra kur tÿ vènh kri fón tũ ra Topê mré vî kÿ tóg há tũ nĩ. Fag tÿ kur tÿ vènh kri fón tũ ra Topê vî tó kÿ fag tóg ãjag kri ke ên mÿ'a han mũ sir, kÿ tóg fag mÿ'a tĩ gé sir, fag krĩ kator ri ke ti nĩ sir.

⁶ Hã kÿ tóg fag tÿ vënh kri fón sór tũ kÿ fag krĩ kator ri ke nĩ. Hã ra tóg fag mÿ'a tĩ, fag gãnh ronh ke to, fag krĩ kator nĩnh ke to. Hã kÿ tóg há tĩ gé, fag tÿ kur tÿ vënh kri fón ti.

⁷ Hÿ, hã vë. Ag kãmĩ ù tóg kur tÿ vënh kri fón ke tũ nĩ, ti tÿ tÿ Topẽ ri ke nĩn kÿ, ãg tÿ ti tigrĩn Topẽ tÿ ti kri tÿ ùn mág nĩ ven kÿ. Hã ra ãg tóg ùn tÿtá fag hã tigrĩn ãg tóg ag tÿ fag kri tÿ ùn mág nÿtĩ vég tĩ.

⁸ Ha vé, Topẽ pi(jé) ùn ve fi tÿ ùn ve ti han ja nĩ'. Ûn ve tÿ tóg fi han ja nĩ mÿr.

⁹ Kÿn pi(jé) fi tigrĩn ti han'. Ti hã tugnĩn tóg fi han.

¹⁰ Hã kÿ ùn tÿtá fag tóg kur tÿ vënh kri fón ke mũ, fag tÿ tÿ ag krêm ke nÿtĩn kÿ. Kÿ Topẽ tÿ jënẽ jafã ag tóg fag tÿ tÿ ag tũ nÿtĩ ki kanhró nÿtĩ sir, kur ãn to.

¹¹ Hã ra ãg kar vÿ ãg Senhor ki ge kÿ nÿtĩ. Ti ki ge kÿ nÿtĩn kÿ ùn tÿtá fag pi(jé) ãjag pir mÿ tÿ nén ù nÿtĩ'. Ag mré ke fag nÿtĩ. Kÿ ag pi(jé) ãjag pir mÿ tÿ nén ù nÿtĩ gé'. Fag mré ke ag nÿtĩ gé. Jagnẽ ki rĩr ãg tóg tĩ ha.

¹² Hÿ, ùn tÿtá fi vÿ tÿ ti ki han kÿ nĩ. Hã ra ag kar tóg fag ki mur tĩ sir, jãvo ãg kar vÿ tÿ Topẽ tÿ há (r) kar nÿtĩ.

¹³ Kÿ to jykrén, ãjag. Há tũ tóg nĩ, ùn tÿtá fag tÿ kur tÿ vënh kri fón tũ ra Topẽ mré vëmén kÿ.

¹⁴ Fag kar vÿ kur tÿ vënh kri fón tĩ, ãg mré ke tũ fag mré hã. Hã kÿ ãg vësóg ki ki kanhró nÿtĩ, vënh jykre tag ti. Há ti nĩ mÿr.

Ag mÿ'a tóg tĩ, ag gãnh téj ti. Vësóg ki ãg tag to jykrén tĩ.

¹⁵ Hã ra tóg fag mÿ sér tĩ, fag gãnh téj ti. Hÿ, fag gãnh vÿ tÿ fag krĩ kri fón ja ri ke nĩ.

16 Hën ri ke mün ãjag kãmĩ ù mÿ tóg há tũ nĩ hã ra, fag krĩ kri fón ja ti. Kÿ tag to jykrén nĩ, ha mẽ: ã tÿ kri fón sór tũ tag pi(jé) tÿ ěg jykre nĩ'. Topě tũ fag jykre pijé'. Igreja kar ki fag tóg kur tÿ vënh kri fón tũ, ha mẽ. Kÿ igreja krēm ěg mÿ'a han sór tũg nĩ.

Santa Ceia to vënh jykre

(Mt 26.26-28; Mc 14.22-24; Lc 22.17-20)

17 Kÿ sóg nén ù ki ãjag mÿ vĩ há han ke tũ nĩ gé. Æjag jykre ù tóg há tũ nĩ, ha mẽ. Æjag vënh mãn kÿ ãjag nëji, Jesus jamĩ ko kÿ ãjag nëji jagně jën vóg tĩ, kÿ ãjag nëji jagně kókég tĩ sir.

18 Æjag vënh mãn kÿ ãjag nëji jagně kato tẽ tĩ, vënh kãpãm kÿ, kÿ tóg inh mÿ ki hã ke ve nĩ, sÿ to jykrén kÿ. Æjag kãmĩ ù hÿn vënh kãpãm sór tĩ, he sóg tĩ.

19 Hÿ, há ti nĩ vë, ãjag tÿ vënh kãpãm kÿ nÿtĩn kÿ. Kÿ ùn jykre há ag vÿ vënh ven ke mũ, ãjag kãmĩ.

20 Kÿ, ãjag vënh mãn kÿ ãjag pi(jé) ěg Senhor jamĩ ko tĩ', Santa Ceia he mũ ěn tĩ'.

21 Tÿ festa han kÿ ãjag kar nëji vënh fãn hã jé ko tĩ, ãjag fór sór kÿ. Tá jun kÿ ãjag nëji kãnhmar ko tĩ. Kÿ ù ag nëji vënh fãn tĩ, vinho kron kÿ ag nëji tÿ pépév tĩ, jó ù ag tóg kókĩnkĩr tĩ sir, ù tÿ kãnhmar tá junjun mũ ag tÿ ag tũ kaggran kÿ.

22 Ha mẽ, vënhmÿ ti nĩ. Topě mré ke ag to é he mũ ve ãjag tóg nÿtĩ mÿr', ãjag tÿ ag tũ kaggran kÿ. Æn jagtar ag mÿ'a han ãjag tóg mũ mÿr', ãjag tÿ ag jën kaggran kÿ, ag junjun to hã. Tag tÿ inh hÿn hë ri kenh mũ? Inh mÿ ãjag mÿ vĩ há han ke mũ', tag to'? Vó', kenh ke tũ inh nĩ. Kórég ti nĩ, ãjag tÿ han mũ tag ti. Æjag ĩn hã tá vëjën tÿ vënh fãn nĩ.

23 Ha mẽ, ẽg Senhor tóg inh mỹ tó ja nĩ, sỹ ãjag mỹ tó mũ ti, ẽg tỹ ti ter to jykrén kỹ tag han jé, ha mẽ. Kuty ẽn kã, Judas tỹ pã'i ag mỹ ẽg Senhor tỹ Jesus tó ja ẽn kã ẽg Senhor tóg ẽmĩ mãn ja nĩgtĩ, Jesus ti.

24 To tóg Topẽ mré vỹ ja nĩgtĩ. Kupãn kỹ tóg ag mỹ: “inh hã vỹ,” he ja nĩgtĩ. “Ãjag jagfy sóg ter ke mũ. Kỹ inh mĩ ẽkrén nĩ, ãjag tỹ pão tag kon kỹ,” he ja tóg nĩgtĩ.

25 Ag tỹ ko kar kỹ tóg copa mãn ja nĩgtĩ gé sir. Kỹ tóg ag mỹ: “copa ki jẽ tag vỹ inh kyvénh ri ke nĩ,” he ja nĩgtĩ. “Inh jykre tãg to ken hã vỹ, isỹ inh kyvénh tigrĩn ãjag mỹ vãnh pãte fón jé. Kỹ inh kyvénh tỹ inh ki kutẽ mũ ẽn mĩ ẽkrén nĩ, ãjag tỹ copa kãkã nĩ tag kron kỹ,” he ja tóg nĩgtĩ gé.

26 Hã kỹ ẽg tỹ ẽmĩ ẽn kon kỹ, ẽg tỹ copa kãkã nĩ ẽn kron kỹ ẽg tóg sir ẽg Senhor ter ti tó tĩ. Tag han ẽg tĩ, ti kãtĩg ken jo.

27 Hã kỹ vãnh jykre kórég ki ẽmĩ ẽn ko sór tũg nĩ, copa kãkã nĩ ẽn kron kónãn sór tũg nĩ gé, ẽg Senhor tũ ti. Ke tũ nĩ mũ ra tóg ẽg tỹ ti ter to é he ri ke nĩ, ẽg tỹ ti kyvénh kutẽ to é he ri ke ti nĩ, ẽg tỹ ẽg jykre kórég ra kron kỹ.

28 Hã kỹ ẽg jé ẽg jykre tugnỹm. Tugnỹm kar kỹ, ti há nĩ ve kar kỹ ẽg tóg ẽmĩ ẽn konh mũ, copa kãkã nĩ ẽn kron ke mũ gé.

29 Ẽg tỹ ón kỹ ko sór kỹ, ón kỹ kron sór kỹ, ti tỹ ẽg mỹ vỹjẽn ù ri ke nĩn kỹ Topẽ tóg ẽg vóg kónãn ke mũ sir, ẽg tỹ ẽmĩ ẽn to ẽg Senhor ter mĩ ẽkrég tũ nĩn kỹ. Kỹ ẽg tóg Topẽ tỹ ẽg vóg kónãn hã jé tỹ nẽn ù tũ han kỹ ko' he mũ, kron' he mũ gé sir.

30 ãjag tỹ Jesus jamĩ ko to vãnh ki rĩr há han tũ nỹtĩn kỹ, hã kỹ ù ag tóg krónhkrój nỹtĩ, ãjag kãmĩ,

kỹ ù ag tóg kaga nýtĩ, kỹ ù tỹ hên ri ke ag tóg kăgter huri ke gé.

³¹ Ha vé, êg tỹ êg jykre tugnỹm kỹ ti mỹ tó kỹ tóg êg mỹ vênh pâte fón ke mũ. Kỹ tóg êg jykre tugnỹm măn ke tũ nĩ sir, êg vóg kónăn ke tũ tóg nĩ gé, êg Senhor ti.

³² Hã ra tóg kejên êg vóg kónăn tĩ. Êg Senhor tỹ êg kanhrăn sór vê, ti tỹ êg tỹ kygnê to êg vóg kónăn kỹ, ti tỹ êg văm tũ nĩ jé, ù tỹ ti vĩ mranh mũ ag mré hã.

³³ Inh kanhkã', tag to jykrén, kỹ jagnê jăvăn nĩ, âjag tỹ vễjên tỹ Santa Ceia ko sór kỹ.

³⁴ Âjag kămĩ ù kókĩr nĩn kỹ tóg ã ĩn tá ã jên tỹ vênh făn ke mũ, ke tũ nĩ mũ ra tóg âjag vóg kónăn ke mũ, êg Senhor ti, âjag tỹ vênh măn kỹ vênh fănfan kỹ.

Sỹ âjag mỹ nén tónh ke ù tóg nýtĩ ke gé, hã ra sóg rán ke tũ nĩ. Sỹ âjag mré nĩnh ken kỹ sóg âjag mỹ kămén ke mũ.

12

Topê vỹ êg tar han mũ, ti kuprĩg tỹ

¹ Kỹ sóg âjag mỹ Topê kuprĩg tỹ êg krĩn ke tag tó sór mũ, âjag tỹ inh ki jêmên kỹ. Kejên tóg nén ù to êg tar han tĩ, êg tỹ han jé, Topê kuprĩg ti.

² Ha vé, văsỹ, âjag tỹ Jesus ki ge tũg ki âjag tóg ón kỹ vênh kăggrá tỹ topê nón mũ ja nĩgtĩ gé. Vĩ vãnh ti nýtĩ, vênh kăggrá tỹ topê ti, hã ra Japo vỹ âjag tỹ ag ki rã han ja nĩgtĩ.

³ Hã kỹ sóg tag to âjag kanhrăn sór mũ, ha mẽ. Topê kuprĩg tỹ êg krĩn kỹ êg pi(jé) Jesus to: “Nén-Kórég ag pã'i mág,” he tĩ'. Jăvo êg tỹ Jesus mỹ: “êg Senhor,” hen kỹ Topê kuprĩg tóg êg krĩn mũ sir, ke tũ nĩ mũ ra êg ti mỹ: “êg Senhor,” he vãnh nĩ sir.

⁴ Kÿ Topẽ kuprĩg vỹ tỹ ùn pir nĩ, hã ra tóg ãg tar han tĩ, nèn ù kar to. Vyrmỹ tóg ãg tân tĩ', ãg tân tĩ' he tĩ.

⁵ Kÿ ãg rãnrãj vỹ e nỹtĩ gé, ãg kar vỹ vyrmỹ rãnrãj nỹtĩ gé, hã ra tóg pir nĩ, ãg Senhor ti, ù tỹ ãg mỹ vãnh rãnrãj nĩm tĩ ti.

⁶ Kÿ ãg tỹ ti jykre ki nèn ù hyn han mũ vỹ e nỹtĩ, hã ra tóg pir nĩ, Topẽ ti, ù tỹ ãg tar han mũ ti.

⁷ Kÿ Topẽ kuprĩg vỹ ãg tar han kãn tĩ sir, kÿ tóg ù tỹ nèn ù to tân kÿ nĩ han tĩ, jó tóg ù tỹ nèn ù ù to tân kÿ nĩ han tĩ gé, ãg kar tỹ jagnẽ mỹ nèn ù há han jé, ãg tỹ nèn ù to tar nỹtĩ ãn tỹ.

⁸ Hã kÿ Topẽ kuprĩg tóg ù tar han tĩ, ti tỹ ãg mỹ ti vĩ kãmén há han jé sir. Û tar han tóg tĩ gé, ti tỹ Topẽ vĩ ki nèn ù kar ki kanhró nĩ jé.

⁹ Kÿ Topẽ kuprĩg tóg ù tar han tĩ, ti tỹ ti ki fé mág to. Û tar han tóg tĩ gé, ti tỹ ùn kagyga tỹ há' he jé, Topẽ kuprĩg ãn ti mÿr.

¹⁰ Û tar han tóg tĩ gé, ti tỹ ãg tỹ nèn han vãnh han jé, ù tar han tóg tĩ, ti tỹ ãg jyvẽn há han jé, kÿ tóg ù tar han tĩ, ti tỹ: “tag vỹ tỹ vãnh jagrẽ há nĩ, tag vỹ tỹ vãnh jagrẽ kórég nĩ,” he jé. Û tar han tóg tĩ, ti tỹ ãg tỹ vãnh vĩ ki kagtĩg ki Topẽ mré vēmén jé, kÿ tóg ù tar han tĩ, ti tỹ ãg tỹ vãnh vĩ ki kagtĩg mẽ kÿ ãg vĩ ki tó jé sir.

¹¹ Hã ra tóg pir nĩ, Topẽ kuprĩg ti. Ti pir nĩ ra tóg nèn ù e tag hyn han tĩ, kÿ tóg to ãg tar han tĩ. Ti hã ne to jykren kÿ: “tag tar han jé sóg ke mũ, tag to, jó sóg ù ãn tar han ke mũ, ãn to,” he tĩ'. Kÿ tóg vyrmỹ ù tar han', vyrmỹ ù tar han' he tĩ sir.

Nèn ù pir ri ke ãg nỹtĩ, ãg jagrẽ pir nĩn kÿ

12 Ęg há to jykrén nĩ, ha mẽ. Ęg há vỹ tỹ ùn pir nĩ, hã ra Ęg há ki nỹtĩ vỹ e nỹtĩ, Ęg pẽn, Ęg nĩgế, Ęg nĩgrếg, ti kar ti. Kỹ Ęg há ki nỹtĩ kar vỹ tỹ Ęg há nĩ sir. Nén ù pir vẽn sir, ti e nỹtĩ ra, ti tỹ Ęg ki nỹtĩ kar nĩn kỹ. Tag ri ke Ęg nỹtĩ gế. Cristo há ri ke Ęg nỹtĩ, Ęg tỹ ti ki ge kỹ nỹtĩn kỹ.

13 Topẽ kuprĩg vỹ tỹ ùn pir nĩ, kỹ Ęg kar vỹ kygpe kỹ nỹtĩ, ti kuprĩg tỹ, hã vỹ: Cristo há pir, he mũ. Ęg kãmĩ ù ag tóg tỹ povo tỹ Israel ag ki ke nỹtĩ, ù ag tóg tỹ povo ù ag ki ke nỹtĩ gế, ù ag tóg ẽprã ke tỹ patrão nỹtĩ, jó ù ag tóg patrão tũ nỹtĩ. Hã ra Topẽ kuprĩg vỹ tỹ ùn pir nĩ, Ęg jagrẽ ti, kỹ tóg tỹ Ęg jagrẽ kar nĩ, ti pir nĩ hã ra. Nén ù pir vỹ tỹ Ęg nỹtĩ.

14 Ęg há vỹ ge nĩ, ha mẽ. Ęg há ki nỹtĩ pi(jé) tỹ ùn pir nĩ'. E ti nỹtĩ, Ęg há ki nỹtĩ ti. Kỹ Ęg jế Ęg rãnrãj to vỹ vỹ he tũ nĩ.

15 Hẽn ri ke mũn Ęg pẽn tóg to jykrén kỹ: “inh pi(jé) tỹ vẽn nĩgế nĩ', hã kỹ sóg vẽn há ki nỹtĩ tũ nĩ,” he tĩ. Hã tũ vẽn hã ra. Ęg há ki nỹtĩ ti nĩ, Ęg pẽn ti, ti tỹ tỹ Ęg nĩgế tũ nĩ ra.

16 Kỹ Ęg nĩgrếg tóg to jykrén kỹ hẽn ri ke mũn: “inh pi(jé) tỹ vẽn kanẽ nĩ', hã kỹ sóg vẽn há ki nỹtĩ tũ nĩ,” he tĩ gế. Hã tũ vẽn mỹr.

17 Ęg há tỹ tỹ vẽn kanẽ tãvĩ nĩ hã ra Ęg ne tỹ jẽmẽn mũ vẽn? Ęg há tỹ tỹ vẽn nĩgrếg tãvĩ nĩ hã ra Ęg nén ù ger mẽn ke tũ nĩ vẽn.

18 Topẽ hã ne Ęg há ki nỹtĩ hyn han kãn', kỹ tóg ti ki nỹtĩ kar mỹ vỹrmỹ vẽn jykre vin kãn ja nĩgtĩ, ti tỹ ã rãnrãj ẽn han jế. Topẽ tỹ nén to jykrén jan hã vẽn.

19 Kỹ ti ki nỹtĩ kar tỹ vẽn jykre pir nĩ ra Ęg há vỹ tũ nĩ vẽn.

²⁰ Há ti nĩ, Topẽ jykre ti. Ěg há ki nỹtĩ jykre e han ti, ti e tỹ ěg há pir han jé sir.

²¹ Hã kỹ ěg kanẽ pi(jé) ěg nĩgé mỹ: “ã pi(jé) inh mré rãnrãj tĩ,” he tĩ'. Kỹ ěg krĩ vỹ ge nĩgtĩ gé. Ěg pẽn mỹ ti: “ã pi(jé) inh mré rãnrãj tĩ,” he tũ nĩgtĩ gé.

²² Ge tũ ti nĩ, ěg há jykre ti. Ěg há ki nỹtĩ ũ tóg rãnrãj krój han nĩ ve nĩ, hã ra ěg tóg jarĩn mỹ tỹ jagnẽ mré rãnrãj kãn tĩ.

²³ Kỹ ti ki nỹtĩ ũ tóg rãnrãj kufy han tĩ, kỹ ěg tóg hã ra ti ki rĩr há han tĩ sir. Kỹ ti ki nỹtĩ ũ tóg ěg mỹ sĩnvĩ tũ nỹtĩ, hã kỹ ěg tóg kur krẽm ti rãg tĩ.

²⁴ Ũ tỹ ěg mỹ sĩnvĩ nỹtĩ tỹ ěg tóg kur krẽm rãg tũ nĩgtĩ sir. Kỹ Topẽ tóg ěg mỹ vẽn jykre nĩm, ěg tỹ ti ki nỹtĩ tỹ vẽn rãnrãj kufy han mũ ěn ki rĩr há han jé sir. Ěg há jykre hã vẽ. Topẽ vỹ to jykrén kãn, kỹ tóg ěg há ki nỹtĩ han kãn,

²⁵ ěg há tỹ vẽn jykre pir han jé. Kỹ tóg ti mỹ há tĩ, ěg tỹ ěg mré Jesus ki ge kỹ nỹtĩ kar ag ki rĩr há han kỹ. Ěg tỹ jagnẽ ki rĩr há han kỹ ěg kãmĩ ũ vỹ jagtar tũ nỹtĩnh mũ, ěg tỹ ěg há ki nỹtĩ jykre pir ri ke han kãn kỹ, jagnẽ mỹ.

²⁶ Hỹ, ěg há ki nỹtĩ pir kaga nĩn kỹ tóg kaga kãn tĩ sir. Kỹ tóg ge nĩ gé, ěg mré. Jagnẽ mré tóg ěg mỹ e tĩ. Kỹ ũ tỹ ěg kãmĩ ũ mỹ vĩ há han kỹ tóg ěg kar mỹ sér tĩ gé sir.

²⁷ Ha mẽ, Cristo há ri ke ěg nỹtĩ, kỹ ěg kar vỹ ti há ki nỹtĩ ri ke nỹtĩ gé sir.

²⁸ Kỹ Topẽ tóg ũ tỹ igreja ki ke kar mỹ vẽn rãnrãj vin kãn, ěg mỹ. Ěg kãmĩ ũ ag vin tóg, ag tỹ tỹ apóstolo nỹtĩ jé. Tag pãte tóg ũ ag vin, ag tỹ jagnẽ jykre ki kanhrãn kỹ jagnẽ jyvẽn jé. Tag pãte tóg ũ

ag vin, ag tỹ tỹ ti vĩ tó jafã nỹtĩ jé. Kỹ tóg ù ag vin, ag tỹ ãg tỹ nén han vãnh hyn han jé. Kỹ tóg ù ag vin, ag tỹ ùn kagyga tỹ há' he jé. Kỹ tóg ù ag vin, ag tỹ ù jagãgtãn jé. Kỹ tóg ù ag vin, ag tỹ tỹ igreja krêm tỹ pã'i nỹtĩ jé. Kỹ tóg ù ag vin, ag tỹ ãg tỹ vãnh vĩ ki kagtĩg ki Topẽ mré vēmén jé.

²⁹ ãg kar pi(jé) tỹ apóstolo nỹtĩ'. ãg kar pi(jé) tỹ vãnh jyvẽn jafã nỹtĩ'. ãg kar pi(jé) tỹ Topẽ vĩ kãmén jafã nỹtĩ'. ãg kar pi(jé) ãg tỹ nén han vãnh hyn han tĩ'.

³⁰ ãg kar pi(jé) ùn kagyga tỹ há' he tĩ'. ãg kar pi(jé) ãg tỹ vãnh vĩ ki kagtĩg tỹ Topẽ mré vēmén tĩ'. ãg kar pi(jé) vãnh vĩ ãn mẽ kỹ ãg vĩ ki hã tó tĩ'.

³¹ Kỹ Topẽ mỹ to vĩ mág, ti kuprĩg tỹ nén ù há to ãjag tar han jé, ãjag kar tỹ jagnẽ mré rãnhřãj kãn jé sir.

ãjag tỹ nén han mũ ù tóg há sĩ nĩ, kỹ ù tóg há tãvĩ nĩ gé. Kỹ sóg ãjag mỹ nén ù há tãvĩ kãmén sór mũ, ha mẽ.

13

Vãnh kar to há nỹtĩmnĩ

¹ Hẽn ri ke mũn ãg tóg ãprã ke ag vĩ tỹ hẽn ri ke tó há nỹtĩgtĩ, Topẽ tỹ jẽnẽ jafã ag vĩ mré hã. ãg tỹ jarĩn mỹ vãnh kar to há tũ nỹtĩn kỹ ãg tóg ón kỹ ke nĩ hã ra, ãg vĩ tag ti. ãg tỹ vãnh kar to há tũ nỹtĩn kỹ ãg tóg ón kỹ vĩ há han tĩ, ferro tỹ véké kyr ri ke, sino tỹ kejẽn ón kỹ kyr ãn ri ke.

² Hẽn ri ke mũn ãg tóg vãnh jyvẽn há han tĩgtĩ. Topẽ hẽn ri ke mũn nén ù kar tó tĩ ãg mỹ, ãprã ke jykre ki kanhró kar ãg nỹtĩ hẽn ri ke mũn. Hẽn ri ke mũn ãg tóg Topẽ ki rã há han kỹ nỹtĩ, kỹ ãg ti vĩ

to: “hỹ mỹ vỹ?” he tũ pẽ nĩgtĩ. Kĩ ẽg tóg pãnónh mỹ: “ha tĩg,” he tĩ, hã ra tóg sir tĩ tĩ. Ẽg tỹ jarĩn mỹ vẽn kar to há tũ nỹtĩn kĩ tóg tỹ ón kĩ ke nĩ.

³ Hẽn ri ke mũn ẽg tóg ẽg tũ vin kãn tĩ, ùn jagtar ag mỹ. Hẽn ri ke mũn ẽg tóg ù tỹ Jesus kato tẽ mũ ag mỹ vẽn fẽg mũ, ag tỹ ẽg pũn jé. Ẽg tỹ jarĩn mỹ vẽn kar to há tũ nỹtĩn kĩ tóg ẽg mỹ nén ù há han ke tũ nĩ.

⁴ Ẽg tỹ vẽn kar to há nỹtĩn kĩ ẽg tóg vẽn kar to fen nỹtĩ. Ag mỹ ẽg tóg nén há kar han sór mũ. Ẽg pi(jé) jagnẽ tũ to én ke mũ'. “Ã kãfór vỹ tỹ inh nĩ,” henh ke tũ ẽg tóg nĩ. “Ủn mág vỹ tỹ inh nĩ,” henh ke tũ ẽg tóg nĩ gé.

⁵ Vẽnhmỹ mẽ han ke tũ ẽg tóg nĩ gé, ẽg tũ tãvĩ hã to jykrén ke tũ ẽg tóg nĩ gé. “Ti hỹn ne ki kanhrãn ke tũ pẽ nĩ,” henh ke tũ ẽg tóg nĩ gé. Kĩ ù tỹ ẽg vóg kónãn mũ ra ẽg tóg ti to jũnh ke tũ nĩ gé.

⁶ Ẽg tỹ vẽn jykre pãno ven kỹn pi(jé) ẽg mỹ sér tĩnh mũ'. Ẽg tỹ ù tỹ ki hã tó mũ mẽ kĩ tóg ẽg mỹ sér tĩnh mũ.

⁷ Ẽg tỹ nén ù jagy vég mũ ra ẽg pi(jé) to vĩnh ke mũ'. Nén ù kar to ẽg tóg: “Topẽ vỹ tag han há nĩ,” henh ke mũ. Ti hã ki ẽg tóg nén ù kar ve sór ke mũ. Vẽn kar ki ẽg fe mág nỹtĩnh mũ, ẽg tỹ vẽn kar to há nỹtĩn kĩ.

⁸ Ẽg tỹ vẽn kar to há nỹtĩ ẽn vỹ krỹg ja tũ nĩnh mũ. Jãvo ẽg tỹ jagnẽ jykre ki vẽn kanhrãn kĩ jagnẽ jyvẽn tĩ ẽn vỹ krỹg ja nỹ. Ẽg tỹ ẽg tỹ vẽn vĩ ki kagtĩg tỹ Topẽ mré vēmén tĩ ẽn vỹ krỹg ja nỹ gé. Ẽg tỹ ẽprã nén ù ki kanhró nỹtĩ ẽn kar vỹ krỹg ja nỹ gé.

⁹ Ủri ẽg tóg nén sĩ hã ki kanhró nỹtĩ. Nén sĩ tỹ ẽg

tóg jagnē jyvēn tī, Topē tỹ ěg mỹ tó tỹ. Ěg pi(jé) ki kanhrān kān kỹ nỹtī ver'.

¹⁰ Kānhmar tóg vēnh ven ke mũ, ũ tỹ nén ũ kar ki kanhró kar nĩ ěn ti. Kỹ hā ěg tóg nén ũ hyn han há tāvī han kān ke mũ, kurā ěn kã.

¹¹ Ěg mog mũ ri ke ti nĩ. Vāsỹ sóg sī ja jęgtī. Kỹ sóg ũn kāsir ag tỹ nén tó tī ěn tó ja nĩgtī gé. Ũn kāsir ag mỹ ke ěn tóg inh mỹ ke ja nĩgtī gé. Ũn kāsir tỹ nén to jykrén tī ěn to sóg jykrén ja nĩgtī gé. Kejēn sóg sanh há jē sir. Kỹ sóg ũn kāsir jykre tovānh kān ja nĩgtī. Ěn ri ke ti nĩ, ěg Senhor kãtīg mǎn ke ti. Ki kanhrān kān jé ěg tóg ke mũ, ěn kã.

¹² Ũri ěg tóg ve há han tũ nĩgtī ver, ěg Senhor jykre ti, kỹ tóg ěg tỹ vēnh ve jafā ki vēnh ve há han tũ ri ke nĩ. Kutỹ nĩ ve ti nĩ, ěg tỹ vēnh ve jafā ki nén vég mũ ti. Hā kỹ ěg tóg ve há han tũ nĩ ver. Kurā ěn kã ěg tóg nén kar ve há han kān ke mũ hā ra. Ěg hā vỹ tóg ti venh ke mũ. Ũri ěg tóg sīn kỹ ti ki kanhró nỹtī. Kurā ěn kã ěg tóg ki kanhrān kān ke mũ, ti tỹ ěg ki kanhró kar ěn ri ke.

¹³ Hā kỹ tag vỹ krỹg ja tũ nỹ, ha mẽ. Ěg tỹ Topē ki rā mũ vỹ krỹg ja tũ nỹ. Ěg tỹ ti hā ki nén ũ kar ve sór mũ vỹ krỹg ja tũ nỹ gé. Ěg tỹ vēnh kar to há vỹ krỹg ja tũ nỹ gé. Kỹ nén ũ pir tóg kǎfór nĩ, hā vỹ: ěg tỹ vēnh kar to há nĩ, he mũ.

14

Topē vỹ ā kuprīg tỹ ěg tar han tī, ěg tỹ jagnē ki rĩr jé

¹ Kỹ vēnh kar to há nỹtīmñĩ. Kỹ Topē mỹ to vīmñĩ gé, ti kuprīg tỹ nén ũ to ājag tar han jé. Ti tỹ nén ũ to

ẽg tar han tĩ ù vỹ kãfór nĩ, hã vỹ: ẽg tỹ jagnẽ jykre ki kanhrãn kỹ jagnẽ jyvẽn tĩ, he mũ.

² Ẽg tỹ hã ra ẽg tỹ vẽn vĩ ki kagtĩg ki vẽnén kỹ ẽg pi(jé) ẽprã ke ag mỹ nén ù tó tĩ'. Topẽ hã mỹ ẽg tó tĩ, ẽg tỹ tag tó kỹ. Û pi(jé) ki kanhró nĩ', ẽg tỹ vẽn vĩ ki kagtĩg ki vẽnén kỹ'. Topẽ kuprĩg hã tóg ẽg krĩn tĩ, ẽg tỹ vẽn vĩ ki kagtĩg ẽn tó jé. Kỹ ẽg tóg ki kagtĩg nỹtĩ, ẽg tỹ nén tó mũ ti.

³ Ẽg tỹ hã ra ẽg vĩ ki jagnẽ jyvẽn kỹ ẽg tóg ù tỹ mẽg mũ kar jyvẽn tĩ sir. Tỹ ẽg tóg jagnẽ tar han tĩ, Topẽ to. Jagnẽ jyvẽn ẽg tóg tĩ, jagnẽ fe kaj tỹ ẽg tóg tũg' he tĩ gé, ẽg tỹ jagnẽ mỹ ẽg vĩ ki vẽnén kỹ.

⁴ Û tỹ ẽg tỹ vẽn vĩ ki katĩg ki vẽnén mũn vỹ vẽnhmỹ tỹ ùn tar jẽ sir, Topẽ to, ùn vẽnén mũ ti. Û tỹ ẽg vĩ ki vẽnén jyvẽn tĩ ẽn tóg ẽg tar han kãn mũ sir, Topẽ to, ẽg mré vẽn mãn kỹ nỹtĩ ag kar.

⁵ Inh mỹn há tĩ vẽ, ãjag kar tỹ ẽg tỹ vẽn vĩ ki kagtĩg tỹ Topẽ mré vẽnén há hã ra. ãjag kar tỹ ẽg vĩ ki jagnẽ jykre to jagnẽ jyvẽn há nỹtĩ ra tóg hã ra tag kãfór nĩ. Kỹ tóg inh mỹ há kãfór nĩ vẽ, ãjag tỹ ke kãn mũ ra. Û tỹ ẽg vĩ ki tó mũ vỹ ù tỹ ẽg tỹ vẽn vĩ ki kagtĩg ki vẽnén mũ ẽn kãfór nĩ, ù tỹ ẽg vĩ ki jagnẽ jykre to vẽnén jyvẽn tĩ ẽn, mỹr, ha mẽ. Kejẽn ù tóg ẽg tỹ vẽn vĩ ki kagtĩg ki vẽnén tĩ. Kar kỹ ù tóg ti vĩ ẽn mẽ kỹ ẽg vĩ ki tó mũ sir, ti tỹ nén tó ja ẽn ti. Tag vỹ há tĩ gé. Û tỹ vẽn mãn kỹ nỹtĩ kar vỹ ki kanhrãn kãn mũ sir, ti vĩ ti, kỹ ag tóg tỹ tar nỹtĩnh mũ sir.

⁶ Inh kanhkã', ha vé. Hẽn ri ke mũn sóg ãjag ki jun kỹ ẽg tỹ vẽn vĩ ki kagtĩg ki vẽnén mũ. Kỹ sóg ãjag mỹ nén ù há han ke tũ nĩ ha, tỹ, ãjag tỹ inh vĩ ki kagtĩg nỹtĩn kỹ. Jãvo isỹ ãjag mỹ Topẽ tỹ inh mỹ

nén tó mũ tỹ ẽg vĩ ki kãmén kỹ sóg tỹ ãjag tar han mũ sir, isỹ ãjag mũ sỹ nén to jykrén mũ kãmén kỹ, sỹ ãjag jyvẽn kỹ, sỹ ãjag mũ Topẽ vĩ ki nén rán kỹ nĩ ẽn kãmén kỹ. Kỹ sóg tỹ ãjag tar han mu sir, mũr, ha mẽ, ãjag tỹ inh vĩ ki kanhrãn kỹ.

⁷ Vãn tỹ vākyn jafã to jykrén nĩ, vākyn jafã ù to ke gé. Ag tỹ kyn kórég kỹ ẽg tóg ki kagtĩg nỹtĩ sir, ag tỹ vākyn mũ ti.

⁸ Kỹ vākyn jafã tỹ trombeta vỹ ge nĩgtĩ gé. Ag tỹ ti kyr mẽ kỹ soldado ag vỹ vẽnh kãn kãn tĩ, vẽnh génh ke to. Ag tỹ tỹ kyn há han tũ nỹtĩn kỹ ag pi (jé) vẽnh génh ke to vẽnh kãn ke mũ'.

⁹ Ge ti nĩ gé, ẽg vĩ ti. Ẽg tỹ ag tỹ ki kagtĩg ẽn tó kỹ ag tóg to jykrén ke tũ nĩ gé, ẽg tỹ nén tó mũ to. Véké ẽg tóg vēmén mũ sir, ẽg tỹ gen kỹ.

¹⁰ Vẽnh vĩ vỹ e nỹtĩ, ga tag kri. Povo kar vỹ vỹrmỹ vĩ nĩ' he kar nỹtĩ. Ẽg vĩ pẽ ki ẽg tóg vēmén ki kanhró nỹtĩ.

¹¹ Kỹ sóg kejẽn hẽ tá ke ù vĩ mẽg tĩ. Sỹ ti vĩ ki kagtĩg nĩn kỹ sóg ti jykre ki kanhrãn ke tũ nĩ, ùn vĩ mũ ti, kỹ tóg inh jykre ki kanhrãn ke tũ nĩ gé. Ge ti nĩ gé, ẽg tỹ vẽnh vĩ ki kagtĩg ki vēmén kỹ. Ki kagtĩg ẽg tóg nỹtĩ sir.

¹² Topẽ kuprĩg tỹ ãjag tar han mũ ve sór ãjag tóg nỹtĩ, nén ù ù to. Kỹ tóg há tĩ. Kỹ hã ra ẽg mré ke ag tar han jafã to ẽn nĩ, ẽn hã to Topẽ mré vĩmnĩ, hã vỹ: ẽg vĩ ki jagnẽ jyvẽn, he mũ.

¹³⁻¹⁴ Ẽg tỹ vẽnh vĩ ki kagtĩg ki Topẽ mré vēmén kỹ ẽg tóg to jykrén kỹ nĩ tũ ra Topẽ mré vēmén tĩ. Kỹ, ã tỹ vẽnh vĩ ki kagtĩg ki vēmén to tar nĩn kỹ Topẽ mũ to vĩmnĩ, ti tỹ ã tỹ nén tó ja ẽn ki kanhrãn kỹ ẽg mũ ẽg vĩ ki kãmén to ã tar han jé gé. Kỹ ã tóg: “tag tó ja

inh nĩ, tag tó ja inh nĩ,” henh ke mũ gé sir, kỹ tóg há tĩ.

¹⁵ Ëg tỹ to jykrén kỹ nĩ tũ ra Topẽ mré vēmén kỹ tóg há tĩ. Ëg tỹ hã ra to jykrén kỹ nĩn kỹ ti mré vēmén kỹ tóg há tĩ gé. Ëg tỹ to jykrén kỹ nĩ tũ ra Topẽ mỹ jãn kỹ tóg há tĩ. Ëg tỹ hã ra to jykrén kỹ nĩn kỹ ti mỹ jãn kỹ tóg há tĩ gé. Sỹ tag han kãn sór vễ.

¹⁶ Ha vé, ã tỹ to jykrén kỹ nĩ tũ ra Topẽ to vĩ há han kỹ ã vĩ mẽg mũ ag vĩ ki kagtĩg nỹtĩ, ã vĩ ti, ã tỹ ãg tỹ vễnh vĩ ki kagtĩg ki vēmén kỹ. Kỹ tóg ag tỹ ã mré: “hỹ, hã vễ,” he sór mũ ra tóg vễnhmỹ tĩ. “Tĩ ne tó mũ vĩ? Sỹ ki kagtĩg tóg tĩ,” he jé ag tóg ke mũ.

¹⁷ Tó há han ã tĩgtĩ, ã tỹ ãg tỹ vễnh vĩ ki kagtĩg ki vēmén kỹ. Hã ra ù tỹ mẽg mũ ag vĩ ki kagtĩg nỹtĩ, kỹ ã pi(jé) ag tar han tĩ'.

¹⁸ Ëg tỹ vễnh vĩ ki kagtĩg ki vēmén to sóg tar pẽ nĩ inhhã. To tar nĩn kỹ sóg ãjag kãfór nĩ.

¹⁹ Hã ra sóg tag tó sór tũ nĩ, ãg vễnh mãn kỹ nỹtĩn kỹ. Hẽn ri ke mũn sóg vễnh vĩ tỹ mil (ke) han ke mũ, ãg tỹ vễnh vĩ ki kagtĩg ki vēmén kỹ. Hã ra sóg jérĩn mỹ ãjag tar han ke tũ nĩ. Hã kỹ sóg tag tó sór tũ nĩ. Sỹ nén to jykrén mũ hã tó sór inh mũ, kỹ sóg inh vĩ pir tỹ ãjag tar han ke mũ.

²⁰ Inh kanhkã', to jykrén há han nĩ. Gĩr tỹ nén ù to jykrén tũ ẽn ri ke nỹtĩ sór tũg nĩ. Vễnh jykre pãno hã to gĩr tỹ ti ki kagtĩg nĩ ẽn ri ke nỹtĩmũ, ãjag tỹ ti kórég han tũ nĩ jé. Nén ù há to jykrén kỹ tóg inh mỹ ãjag tỹ ùn sanh há ag tỹ nén ù to jykrén há ẽn ri ke nỹtĩnh há tĩ.

²¹ Ve ra, Topẽ vĩ rán ki tag vĩ rán kỹ nĩ, ha mẽ. “Inh povo tỹ inh vĩ mẽ jãvãnh nỹtĩn kỹ sóg ag mỹ

ũn vĩ ù ag vĩ ki inh vĩ jẽnẽnh ke mũ. Povo tỹ vyrmynd vĩ ag mỹ sóg: “ha ag mỹ inh vĩ ti tóg,” henh ke mũ, “ag vĩ tù ki hã ra, ù tỹ inh vĩ mẽ jãvãnh ag mỹ,” he jé sóg ke mũ. Hã kỹ ag tóg mẽnh ke tù nĩ, inh povo ti, ag tỹ ag vĩ tù ki ag mỹ vēmén kỹ,” he tóg, ẽg Senhor ti, Topẽ vĩ rá ki.

²² Hã kỹ tóg tỹ ù tỹ Topẽ ki ge jãvãnh ag tỹ ki kagtĩg han jafã nĩ, ẽg tỹ vẽn vĩ ki kagtĩg tỹ vēmén mũ ti. Ti ki ge kỹ nỹtĩ ag mỹ ke pijé'. Jãvo ẽg tỹ jagnẽ jykre ki kanhrãn kỹ jagnẽ jyvẽn tag vĩ tỹ ti ki ge kỹ nỹtĩ ag tar han jafã nĩ. Ti ki ge jãvãnh ag mỹ ke pijé'.

²³ Ha vé, kejẽn ẽg mré ke ag vĩ vẽn mãn kãn mũ. Kỹ vẽn kar tóg hẽn ri ke mũn ẽg tỹ vẽn vĩ ki kagtĩg ki vēmén mũ. Kỹ ù tỹ ki kagtĩg tóg venh ke kãtĩg mũ, ù tỹ Jesus ki rã ja tù ti hẽn ri ke mũn. Kỹ tóg ti tỹ ãjag tỹ vẽn vĩ ki kagtĩg tag mẽ kỹ tóg ãjag to: “krĩ vẽnhmỹ ag nỹtĩ,” henh ke mũ sir, ón kỹ.

²⁴ ãjag tỹ ẽg vĩ ki jagnẽ jykre ki kanhrãn kỹ jagnẽ jyvẽn kỹ tóg hã ra há tĩ. Kỹ ù tỹ Jesus ki rã tù vĩ jun mũ, ù tỹ ki kagtĩg. Kỹ tóg ãjag vĩ mẽnh mũ, kỹ tóg to jykrén ke mũ sir. ãjag vĩ to tóg: “hỹ, hã vẽn,” henh ke mũ. Ti jykre pãno to tóg jykrén ke mũ gé.

²⁵ Ti tỹ nén ù to jykrén mũ vĩ vẽn ven kãn ke mũ, kỹ tóg ti mỹ e tĩnh mũ sir. Mũg ke jé tóg ke mũ. “Topẽ vĩ tỹ ùn mág nĩ,” he jé tóg ke mũ. Kỹ tóg ki kanhró nĩnh mũ, tó jé tóg ke mũ sir, Topẽ tỹ ãjag mré nĩ ti.

Culto ki vẽn jykre

²⁶ Kỹ ãjag vẽn mãn kỹ tag vĩ há nĩ, ha mẽ. ù tóg Topẽ mỹ jãn ke mũ, ti mỹ cantar ken jé. ù tóg Topẽ vĩ tỹ vẽn kanhrãn kỹ tónh ke mũ. ù mỹ tóg nén ù

tónh mũ, Topê ti, ti tỹ tỹ ãjag jyvên jé. Û tóg êg tỹ vãnh vĩ ki kagtĩg ki vēmén ke mũ, ù tóg ti vĩ mẽ kỹ êg vĩ pẽ ki tónh ke mũ, ti tỹ nén tó mũ ên ti. Há kar ti nĩ, ãjag tỹ tag tỹ Topê to tar nỹtĩ jé.

²⁷ ãjag tỹ êg tỹ vãnh vĩ ki kagtĩg ki vēmén sór kỹ ùn pipir ag hã tóg tónh ke mũ, hên ri ke mũn ùn régre, ke tũ nĩn kỹ ùn tãgtũ, jagnê ri ke. Û tỹ tó kỹ ù tóg vĩnh ke tũ nĩ sir. Ûn pir tỹ vēmén kỹ tóg há tĩ. Kỹ ù tóg ti vĩ mẽ kỹ êg vĩ pẽ ki tónh ke mũ gé sir, ti tỹ nén tó mũ ên ti.

²⁸ Kejên tóg ki tũ nĩ, ù tỹ ti tỹ nén tó mũ ên tỹ êg vĩ ki tónh ke mũ ti. Kỹ êg tóg êg tỹ vãnh vĩ ki kagtĩg tỹ vēmén ke tũ nĩ sir, vãnh kar rĩnve. ãjag ãn hã tá vēmén nĩ, êg tỹ vãnh vĩ ki kagtĩg tỹ. Ên tỹ igreja krêm vēmén tũg nĩ, êg tỹ vãnh vĩ ki kagtĩg tỹ, ù tỹ ti tỹ nén tó mũ tỹ êg vĩ ki tónh ke tũ nĩn kỹ.

²⁹ Kỹ tóg ãjag tỹ jagnê jykre ki kanhrãn kỹ êg vĩ ki jagnê jyvên ken kỹ tóg ge nĩ gé, ha mẽ. Ûn régre vỹ tónh ke mũ, ke tũ nĩn kỹ ùn tãgtũ, jagnê ri kén tón jé. Kỹ ag vĩ mẽg mũ ag vỹ to jykren ke mũ, ag tỹ ti kygnê tũ ve jé.

³⁰ Hã ra hên ri ke mũn Topê tóg ù mỹ nén ù tónh ke mũ gé. Kỹ ùn vēmén vén mũ tóg krỹg henh ke mũ ver, kỹ ù tóg ti ri kén tónh mũ sir, Topê tỹ ti mỹ nén tó ja ti.

³¹ Hã kỹ ãjag kar vỹ jagnê jyvên ke mũ, ãjag tỹ jagnê ri kén vēmén kỹ. Gen kỹ ãjag tóg jagnê kanhrãn ke mũ sir, jagnê krĩ kuprãg ke ãjag tóg mũ gé sir.

³² Topê kuprĩg vỹ êg krĩn tĩ, êg tỹ jagnê jyvên jé. Hã ra tĩ pi(jé) êg tỹ nén tó sór tũ ra êg kri gĩnh ke tĩ'.

³³ Hã kỹ tóg Topê mỹ há tũ nĩ, êg tỹ ù vēmén jê ra

ẽg tỹ nén tónh ke mũ ẽn tó sór kỹ. Ẽg tỹ jagnẽ tỹ tó kar kỹ ẽg tỹ nén tónh ke tó kỹ tóg ti mỹ há tí, kỹ vẽn kar tóg jatun mỹ mẽnh ke mũ sir, ẽg tỹ nén tó mũ ti. Topẽ jykre kusan hã vẽ.

³⁴ Topẽ tũ vỹ tỹ ẽg nỹtĩ. Kỹ ùn týtá fag vỹ vēmén ke tũ nĩ, igreja krẽm. Hẽ tá igreja krẽm fag vỹ jatu nỹtĩgtĩ, ẽmã kar mĩ, kỹ ãjag tóg fag ri ke jatu nỹtĩnh mũ gé. “Tỹ fag tóg ag krẽm ke nỹtĩ,” he ja tóg nĩ, Topẽ ti, hã kỹ fag tóg vēmén ke tũ nĩ, igreja krẽm.

³⁵ Kỹ fag tóg ãjag tỹ Topẽ vĩ ki kanhrãn há han tũ nĩn kỹ fag tóg ãjag ìn tá ãjag mén ki jēmẽnũ mũ, ãjag tỹ ki kanhrãn há han tũ ja ẽn ti. Ẽg mỹ'a tóg tĩ, fag tỹ igreja krẽm vēmén sór kỹ, kỹ ke sór tũg nĩ.

³⁶ Ẽjag hỹn tag ki króm sór tũ nĩ, vэг isóg nĩ nĩ. “Ẽg hã vỹ to jykren há tãvĩ han tĩ, ẽg hã vỹ tó vén, vẽn kar jo, Topẽ vĩ ti,” he ãjag tóg tĩ, ẽg kãfór nỹtĩ sór kỹ. Hã ra tóg e nỹtĩ, Jesus ki ge mũ ag. Tó há han ag tóg tĩ gé. Ag mré vẽn jykre pir han sórmnĩ.

³⁷ Ẽjag kãmĩ ù hỹn: “Topẽ vỹ ình mré vēmén tĩ, ti kuprĩg tỹ ình krĩn tag to sóg tar tãvĩ nĩ,” he tĩ. Kỹn hỹn ki kanhró nĩ, sỹ ãjag mỹ Topẽ jykre tó mũ tag, ãjag tỹ igreja krẽm vẽn mãn ke to. Ẽg Senhor tỹ ẽg mỹ vẽn jykre nĩm jan hã vẽ, sỹ ãjag mỹ rán mũ tag ti.

³⁸ Ẽ tỹ tag to: “nén ù tũ vẽ,” he mũ ra sóg ti to: “nén ù tũ vỹ tỹ ã nĩ,” he mũ gé.

³⁹ Ình kanhkã', Topẽ mỹ to vĩ mág, ti kuprĩg tỹ ãjag tar han jé, ãjag tỹ jagnẽ jykre ve kỹ jagnẽ jyvẽn há han jé, ẽg vĩ ki. Ẽ tỹ ẽg tỹ vẽn vĩ ki kagtĩg ki vēmén sór kỹ ti mỹ: “vĩ tũg ra,” he tũg nĩ gé.

⁴⁰ Hã ra ù vēmén jẽ ra ẽg tỹ nén tónh ke mũ ẽn tó sór tũg nĩ. To jykre kusa nỹtĩmnĩ.

15

Jesus rĩr jẽ

¹ Inh kanhkã', sỹ ãjag mỹ Jesus kãme sér ên tó mãn ke vẽ, sỹ ãjag mỹ tó ja ên ti. Ên kri fig ãjag tóg tĩ, kỹ ãjag tóg mĩ mũgtĩ.

² Ti vĩ kri nĩm kỹ ãjag tóg krenkren ke mũ, ãjag tỹ tovãnh tũ nĩn kỹ. Sỹ ãjag mỹ nén tó ja ên tỹ tũ' he tũg nĩ, ke tũ nĩ mũ ra ãjag tóg véké kri fi ja nĩnh mũ. Kỹ ãjag tóg tá nén ù venh ke tũ nĩ gé.

³ Sỹ ãjag mỹ Topẽ vĩ kãmén kỹ sóg ãjag mỹ sỹ nén mẽ ja ên hã tó vén ja nĩgtĩ, hã vỹ: Cristo vỹ ãg jagfy ter ja nĩgtĩ, ãg tỹ Topẽ vĩ mranh ja tugrĩn, he mũ. Tag vỹ rán kỹ nĩ, Topẽ vĩ rá ki.

⁴ Kỹ ag tóg vẽnھ kej kãtã ti fi ja nĩgtĩ. Kurã tãgtũ tũg kỹ tóg rĩr mãn ja nĩgtĩ gé. Tag vỹ rán kỹ nĩ gé, Topẽ vĩ rá ki.

⁵ Kỹ tóg Pedro mỹ vẽnھ ven, kar kỹ ù tỹ 12 (ke) ag mỹ ke gé.

⁶ Kar kỹ tóg ù tỹ 500 (ke) kãfór ag mỹ vẽnھ ven gé, vẽnھ ven pir ki, ag vẽnھ mãn kỹ nỹtĩ ên ki. Ên ag kãmĩ ùn pipir ag tóg kãgter ja nĩgtĩ, hã ra ùn e ag tóg ver ãg mré nỹtĩ.

⁷ Kar kỹ Tiago tóg ti vé gé, kar kỹ ti tỹ ùn vin mũ kar ag, ke gé, apóstolo kar ên ag.

⁸ Kar kỹ sóg vãhã ti vé gé, ag kar nón. Sỹ ti venh ke tũ vẽ vẽ, sỹ kãnhmar ti ki rã ja tũ nĩn kỹ.

⁹ Apóstolo ag krẽm ke kar vỹ tỹ inh nĩ. Sỹ tá krỹg ke tũ vẽ vẽ, sỹ tỹ apóstolo nĩnh ke ti, isỹ Topẽ ki ge kỹ nỹtĩ ag vóg kónãn jan kỹ, fag ke gé.

¹⁰ Hã ra Topẽ tóg inh jagãgtãn, hã kỹ tóg isỹ apóstolo han mũ. Kỹ ti pi(jé) fagrĩnh mỹ inh jagãgtãn'. Rãnrãj mág han inh mỹr, ag rãnrãj

kāfór kar. Hã ra sóg inh pir mÿ han tũ nĩgtĩ. Topẽ hã ne isar han tĩ', inh rãnrãj to'.

¹¹ Hã ra ãg kar tóg Jesus tó tĩ. “Jesus vÿ rĩr jẽ,” he ag tóg tĩ, apóstolo ù ag, kÿ sóg tag tó tĩ gé, ag mré. Kÿ ãjag tóg sÿ ti kãmén kÿ inh vĩ kri fig tĩ.

¹² Ëg kar vÿ Cristo tÿ ter kar ti rĩr mãn ja ãn tó tĩ.

Jesus mré ãg rĩnrĩr mãn ke mũ gé

Cristo rĩr mãn mũ ra ãjag kãmĩ ù tóg ón kÿ: “ãg ter kar kÿ ãg rĩr mãn ke tũ nĩ ha,” he tĩ'. Hã tũ vẽ.

¹³ Ëg tÿ ãg ter kar kÿ rĩr mãn ke tũ nĩ hã ra Cristo vÿ rĩr mãn ja tũ nĩnh mũ gé vẽ vẽ.

¹⁴ Cristo rĩr mãn ja tũ nĩ hã ra ãg tóg fagrĩnh mÿ ãjag mÿ ti kãmén ja nĩnh mũ gé vẽ vẽ. Kÿ ãjag tóg fagrĩnh mÿ kri fi ja nĩnh mũ gé vẽ vẽ.

¹⁵ Kÿ ãg tóg Topẽ to ón ja nĩnh mũ gé vẽ vẽ, ãg tÿ ti to: “Cristo rĩr mãn ja tóg nĩ,” hen kÿ. Kÿ ãg kar vÿ ti to ón ja nĩnh mũ vẽ. Hã ra tóg Jesus rĩr mãn ja nĩ, Topẽ ti.

¹⁶ Hÿ, ùn kãgter mũ ag rĩnrĩr mãn ke tũ nĩ ra Cristo vÿ rĩr mãn ja tũ nĩnh mũ gé vẽ vẽ, ha mẽ.

¹⁷ Kÿ Cristo rĩr mãn tũ nĩ ra ãg tóg fagrĩnh mÿ ti ki ge ja nĩnh mũ gé vẽ vẽ. Kÿ ãg tóg Topẽ vĩ mranh ja ãn hã ki nÿtĩnh mũ vẽ ver, tÿ tũ' he ja tũ ti nĩnh mũ vẽ, ti rĩr mãn tũ nĩ hã ra.

¹⁸ Kÿ ù vẽ gé, ha mẽ: ti rĩr mãn tũ nĩ ra ù tÿ Cristo ki ge kar kÿ kãgter mũ ãn ag vÿ nũgme ki vár kãn kÿ nÿtĩnh mũ gé vẽ vẽ, ha mẽ.

¹⁹ Hã kÿ tóg vẽnĩmÿ tĩ, ãjag tÿ: “rĩr mãn ke tũ ãg nĩ,” hen kÿ. Cristo pi(jé) ãg tÿ ga kri mũ tag tãvĩ ki rĩr nĩgtĩ'. Kanhkã tá ãg tóg junjun ke mũ. Ke tũ nĩ mũ ra ãg tóg ùn jagãgtar ag kāfór kar nÿtĩnh mũ vẽ, ãg tÿ fagrĩnh mÿ Jesus ki rã ja nÿtĩ ra. Hã tũ vẽ mÿr.

²⁰ Cristo vỹ rĩr măn, ter kar kỹ. Hã vễ. Ûn kăgter kỹ nỹtĩ ag kar kămĩ ti rĩr măn vén, Cristo ti, hã kỹ ẽg tóg rĩnrĩr măn ke mũ gé, ẽg tỹ ti ki ge kỹ.

²¹ Ûn pir tigrĩn ẽg kar vỹ kăgter ke mũ, hã kỹ ẽg tóg ùn pir tugnĩn rĩnrĩr măn kăn ke mũ gé, ẽg ter kar kỹ.

²² Adăo tỹ Topẽ vĩ mranh tigrĩn ẽg tóg kăgter kăn ke mũ, ẽg tỹ tỹ ti krẽ nỹtĩn kỹ. Ri ke ti nĩ, Cristo tugnĩn ẽg tóg rĩnrĩr măn kăn ke mũ gé, ẽg tỹ ti ki ge kỹ nỹtĩn kỹ.

²³ Topẽ tỹ nén to jykrén mũn hã vễ, Cristo tỹ ẽg jo rĩr măn tag ti. Hã kỹ tóg rĩr măn vén. Kar kỹ ù tỹ Cristo ki ge kỹ nỹtĩ ag vỹ rĩnrĩr măn ke mũ gé sir, ti kătĩg măn kỹ.

²⁴⁻²⁵ Kỹ văhă kură tỹ ẽgno vễ sir. Kură ẽn kă Jesus vỹ Topẽ mỹ: “ă hă ne ẽg kri ke jẽ ha,” henh ke mũ, ti panh mỹ. Ûri tóg tỹ pã'i mág nĩ ver, Cristo ti, kỹ tóg pã'i ù ag vỹ tỹ tũ' he kăn mũ, ùn jykre tar kar, ù tỹ ẽg kăfór nỹtĩ kar. Tỹ tũ' he kăn jé tóg ke mũ, hã jé tóg ver tỹ pã'i mág nĩ, Cristo ti, ti tỹ ă kato tẽgtẽ mũ ag jykre sãn kăn jé, ti tỹ ag vỹ tỹ tũ' he kăn jé.

²⁶ Ẽg tỹ Topẽ vĩ mranh tigrĩn ẽg kăgter kăn mũ. Hã ra tóg tỹ tũ' henh ke mũ gé, ẽg ter mũ tỹ, kỹ ẽg ter măn ke tũ nĩ ha, kură tỹ ẽgno ẽn kă. Ti tỹ ẽg ter mũ tỹ tũ' hen kỹ tóg há kar nĩ sir.

²⁷ Hỹ, vễnh kar vỹ tỹ ti krẽm ke nỹtĩ, ti tỹ ag jykre sãn kỹ, ti tỹ ùn mág ag vỹ tỹ tũ' hen kỹ. Vễnh kar vỹ tỹ ti krẽm ke nỹtĩ, Cristo krẽm. Hã ra ùn pir vỹ tỹ ti krẽm ke tũ nĩ, hã vỹ: ù tỹ vễnh kar tỹ ti krẽm ke han ja ẽn, he mũ, hã vỹ: Topẽ, he mũ.

²⁸ Vễnh kar tỹ ti krẽm ke nỹtĩn kỹ, kură ẽn kă tóg ti krẽm vễnh fẽg ke mũ gé, ti kósĩn ti, ă panh krẽm,

ũ tỹ vĕnh kar tỹ ti krĕm vin ja ĕn krĕm. Kurã ĕn kã Topĕ tóg tỹ vĕnh kar kri ke jĕnh mũ, ã pir mỹ. Kỹ ũ tóg ti ri ke jĕnh ke tũ pĕ nĩ.

²⁹ Ęg rĩr mãn ke tũ nỹtĩ ra ãjag kã ũ tóg fagrĩnh mỹ ũn ter mũ ag jagfy vĕnh kygpenh mũ vĕ. Ag rĩr mãn tũ ra tóg vĕnhmỹ tĩ vĕ, ãjag tỹ ag jagfy vĕnh kygpenh ke ti. Hã tũ vĕ hã ra. Rĩr mãn jé ĕg tóg ke mũ.

³⁰ Hã kỹ sóg kurã kar ki ti jagy vég tĩ gé, hã ra sóg ag mỹ vĕnh nenh tũ nĩgtĩ, ũ tỹ inh vóg kónãn sór mũ ag mỹ.

³¹ Kurã kar ki sóg ter kren' he tĩgtĩ. Ki hã sóg tó tĩ, ki kanhró ãjag nỹtĩ. Ājag hã ki sóg tỹ ũn mág nĩ, Jesus Cristo ki, ĕg Senhor ki.

³² Cidade tỹ Ęfeso tá sóg mĩg mré rará ri ke han mỹr, hã ra tóg inh mỹ nĕn ũ há han ke tũ nĩ vĕ, ĕg tỹ rĩr mãn' he tũ ra. Ũn kãgter mũ ag rĩnrĩr mãn ke tũ ra ĕg tóg jatun mỹ ĕg tỹ nĕn to ĕn mũ han ke mũ vĕ, ĕg tỹ: “mũ nỹ, jĕn jé, kron jé, ĕg hỹn vaj kỹ ter ke mũ,” hen kỹ, Topĕ ki ge tũ ag ri kĕn ken kỹ.

³³ Hã tũ vĕ hã ra.

Kygnĕ tũg nĩ. Tag to jykrĕn nĩ, ha mĕ: ũn vĩ kórég ag vĩ jĕmĕ sór tũg nĩ. Vĕnh jykre há pãno han ti tĩ, ag vĩ kórég ti.

³⁴ Krĩ há han ra, tag hã ne há nĩ'. Topĕ vĩ mranh tũg nĩ. Ājag kãmĩ ũ vỹ Topĕ ki kanhró tũ nỹtĩ ver'. Tag to vĕnh mỹ en nĩ.

Ęg rĩr mãn ke to vĕnh jykre

³⁵ Kỹ ũ tóg to jykrĕn kỹ inh mỹ: “Topĕ hỹn hĕ ri kĕnh ke mũ, ti tỹ ũn ter mũ ag rĩnrĩn mãn jé?” he sór mũ. “Ęg fár hỹn hĕ ri kĕnh ke mũ?” he sór ãjag hỹn mũ.

36 Krĩ tũ ãjag nýtĩ mÿr'. Nén ù fy jykre vÿ ěg ter ri ke nĩ, ha mẽ. Ěg tÿ krãn kÿ tóg kugnãnh tĩ, ti fár ti, jãvo tóg ti kátá mur mãn mũ sir.

37 Kÿ ti fy pi(jé) ti féj ri ke nĩ gé', ti tÿ han ke ti. Sĩ ti nĩ, trigo fy ti, nén ù kar fy ti ke gé.

38 Topě hã ne ti pěn han mũ', ti féj ke gé, ti fej ke gé. Ti hã ne to jykrén tĩ'. Kÿ tóg nén kar fy mÿ ti féj ù nĩm', ti féj ù nĩm' he tĩ.

39 Kÿ nén ù fár vÿ ge nĩgtĩ gé. Ti pi(jé) pir nĩ gé'. Ěg fár vÿ vyrmÿ nĩ, kar kÿ bicho fár vÿ vyrmÿ nĩ gé, kar kÿ sēsĩ fár vÿ vyrmÿ nĩ gé, jēsĩ fár ti, kar kÿ pirã fár vÿ vyrmÿ nĩ gé.

40 Kÿ kanhkã tãn ag vÿ vyrmÿ fár nýtĩ gé, ěprã ke ag vÿ vyrmÿ fár nýtĩ gé. Kÿ ěg ve vÿ ge nĩgtĩ gé. Kanhkã tá ke ag ve vÿ vyrmÿ nĩ, ěprã ke ag ve vÿ vyrmÿ nĩgtĩ gé.

41 Rã jěngrě vÿ vyrmÿ nĩ, kysã jěngrě vÿ vyrmÿ nĩ gé, krĩg jěngrě vÿ vyrmÿ nĩ gé. Kÿ krĩg ag vÿ jagně ri ke tũ nýtĩ gé, ãjag jěngrě ki.

42 Ge ti nĩ, ěg ter kar kÿ ěg rĩr mãn ke ti. Ter jé ěg tóg ke mũ, kÿ tóg ěg tÿ nén ù fy krãn ri ke nĩ sir, ěg fár tÿ ga ra rã mũ ti. Ěg rĩr mãn kÿ ěg pi(jé) ter mãn ke mũ'.

Kejěn tóg ěg mÿ'a tĩ, ěg ter ke to hã. Hã ra ěg tóg sĩnvĩ nýtĩnh mũ, ěg rĩr mãn kÿ.

43 Krój ěg nýtĩ. Hã ra ěg tóg tar nýtĩnh mũ, ěg rĩr mãn kÿ.

44 Ůri ěg tóg tÿ ěprã ke nýtĩ, kÿ ěg fár vÿ tÿ ěprã ke fár nĩ. Ěg rĩr mãn kÿ ěg tóg Topě kuprĩg jamã tá fár nýtĩnh mũ. Ěprã ěg fár nýtĩ, kÿ ěg tóg tÿ ěprã ke nýtĩ. Kÿ ěg tóg ěg tÿ Topě kuprĩg jamã tá ěg fár ù venh ke ki kanhró nýtĩ sir. Ěprã ke fár ve vén ěg tĩ. Kar kÿ

ẽg tóg Topẽ kuprĩg jamã tá fár ù venh ke mũ, ẽprã ke fár ve kar kỹ.

⁴⁵⁻⁴⁶ Hã kỹ tag tóg rán kỹ nĩ, ha mẽ: “ũn ve ti, Adão ti vỹ rĩr nĩ ja nĩgtĩ. Jãvo ù tỹ ẽgno ti, Cristo ti vỹ ã kuprĩg tỹ nén kar rĩnrĩr han,” he ja tóg nĩgtĩ, Topẽ vĩ rá ki.

⁴⁷ Ûn ve ẽn, Adão ẽn vỹ ga tỹ há (r) nĩ, hã kỹ ti jykre tóg tỹ ẽprã ke jykre nĩ. Cristo vỹ tỹ kanhkã tá ke nĩ.

⁴⁸ Ûn ve vỹ tỹ ẽprã ke nĩ, kỹ ti krẽ kar vỹ tỹ ẽprã ke nỹtĩ gé, ti mré. Jãvo Cristo vỹ tỹ kanhkã tá ke nĩ. Kỹ ti mré ke kar vỹ tỹ kanhkã tá ke nỹtĩ gé, ti mré.

⁴⁹ Ẽprã ke ẽn ve ri ke ẽg nỹtĩ, ẽg kar tỹ Adão ve kỹ. Kỹ ẽg tóg kanhkã tá ke ẽn ve ri ke nỹtĩnh ke mũ gé, ẽg tỹ Cristo ve kỹ, ẽg rĩnrĩr mãn ken kỹ.

Jesus kãtĩg mãn ken kỹ tóg ẽg kar han mãn ke mũ

⁵⁰ Inh kanhkã', sỹ ãjag mỹ tag tó há han sór vẽ, sỹ ki kanhrãn há han kỹ, ha mẽ. Ẽg fár tỹ ẽprã ke tag pí(jé) Topẽ tỹ tỹ ẽg pã'i nĩ venh ke mũ'. Nén ter ke mũ ẽn pí(jé) nén ù ter vãnھ tá venh ke mũ'. Topẽ vỹ ẽg han mãn ke mũ, ẽg tỹ ve jé.

⁵¹ Kỹ sóg ãjag mỹ nén ù tó sór mũ gé, ãjag tỹ mẽ ja tũ ti, ha mẽ. Ẽg kãmĩ ù ag tóg ti jun ke pétẽm mũ, kãgter ke tũ ag tóg nĩ. Kỹ Topẽ tóg ẽg kar han mãn kãn ke mũ, kurã ẽn kã, ẽg tỹ ti ki ge kỹ nỹtĩnh kỹ.

⁵² Kỹ tóg ẽg tỹ pan ke kar mrin ke ẽn ri ke nĩnh mũ, ti tỹ ẽg han mãn ke ti, trombeta kyr rén kã. Trombeta kyr ẽn vỹ mẽ há tĩnh mũ, kỹ ùn kãgter mũ ag vỹ rĩnrĩr mãn kãn ke mũ, ag tỹ kãgter mãn ke tũ nĩ jé sir. Ẽn kã tóg ẽg han mãn ke mũ gé sir, ẽg tỹ ti jun ke pétẽm mũ ra kãgter ja tũ ra.

⁵³ Ha vé, ti tỹ ẽg fár kókrãnh mũ tag tỹ ù han tũ ra ẽg tóg venh ke tũ nĩnh mũ vễ, kanhkã ti. Hã kỹ tóg ẽg fár ter ke mũ tag tỹ ù han ke mũ, ti han mãn kỹ, ti ter mãn tũ nĩ jé, kókrãnh mãn tũ nĩ jé. Kejẽn tóg kenh ke mũ.

⁵⁴ Ẽg fár kókrãnh mũ tag tỹ tóg ù han ke mũ, ti kókrãnh vãn nĩ jé sir. Ẽg fár ter ke mũ tag tỹ ù han jé tóg ke mũ, ti ter vãn nĩ jé. Kurã ẽn kã ẽg tóg vẽn rá tag venh ke mũ gé, vãsỹ rán kỹ nĩ tag, hã vỹ: “tũg ti huri, ẽg ter ke mũ ti, ẽg ter pãte rẽg kỹ,” he mũ. “Topẽ vỹ tỹ tũg’ hé, ẽg ter ke mũ tỹ.

⁵⁵ Kãgter kãn ja ẽg tóg nĩgtĩ. Hã ra ẽg tóg tag ve mãn ke tũ nĩ ha. Nén ù tỹ ã préj tỹ ẽg tugtãn tỹ ẽg tén ri ke ti nĩ, ẽg ter ke mũ ti, hã ra Topẽ tóg tỹ tũg’ hé,” he tóg, Topẽ vĩ rá ki.

⁵⁶ Topẽ vĩ mranh hã tugrĩn ẽg tóg kãgter tĩ. Nén ù tỹ ẽg tugtãg tĩ préj ri ken hã vễ, hã vỹ: ẽg tỹ Topẽ vĩ mranh, he mũ. Hã ra Jesus tóg tỹ tũg’ he kãn, ẽg tỹ Topẽ vĩ mranh tỹ. Kỹ tóg nén ù préj ẽn tỹ préj tũ nĩ ri ke nĩ sir. Ter mãn ke tũ ẽg tóg nỹtĩ ha, kurã ẽn kã. Topẽ vỹ ẽg jyvẽn tĩ. Ẽg tỹ ti vĩ mranh hã tugnĩn ẽg tóg kãgter kãn ja nĩgtĩ.

⁵⁷ Hã ra Jesus tóg tỹ tũg’ hé huri.

Topẽ hã mỹ sóg vĩ há han mũ, ti hã vỹ ẽg tar han tĩ, ẽg tỹ ti vĩ mranh mãn tũg jé. Ẽg Senhor tỹ Jesus Cristo tugrĩn tóg ẽg tar han tĩ, Topẽ ti.

⁵⁸ Tag to jykrén kỹ tar nỹtĩmnĩ, Topẽ to, ãjag tỹ ti ki rã tovãn tũ nĩ jé. Ẽjag to sóg há tãvĩ nĩ, inh kanhkã’. Ẽg Senhor rãnhrãj han kãn sórmnĩ. Tag to jykrén nĩ, ha mẽ: ẽg pi(jé) véké rãnhrãj tĩgtĩ’, ẽg tỹ ẽg Senhor rãnhrãj han kỹ’. Ti kaja ve jé ẽg tóg ke mũ mỹr, kanhkã tá.

16

Ĕg tỹ ěg mré Jesus ki ge kỹ nỹtĩ ag jagãgtãn ke

¹ Kỹ sóg ãjag mỹ ãjag tỹ ù tỹ Topẽ ki ge kỹ nỹtĩ ra jagãgtar nỹtĩ ag mỹ jãnkamy jẽnẽnh ke ẽn tó sór mũ gé sir, ãjag tỹ inh ki nén jẽmẽ sór mũ ti. Ga tỹ Galácia tá igreja krẽm vẽnh mãn tĩ ag mỹ sóg tag tó ja nĩ, sỹ ãjag mỹ tónh ke tag ti, ha mẽ.

² Domingo kar ki nén ù sĩ tỹ vyrmỹ nĩmnĩ, ãjag ãn tá. Û tỹ nén ù mág ẽn tóg nén ù mág sĩ tỹ vyrmỹ nĩm ke mũ gé, kỹ ù tỹ nén ù sĩ ẽn tóg nén ù sĩ tỹ vyrmỹ nĩm ke mũ gé. ãjag tỹ semana kar ki nĩm han kỹ tóg komẽr hã mág mũ sir. Kỹ tóg kar kỹ nĩ, sỹ ãjag ki jun mũ ra. ãjag tỹ inh kãtĩg ken jo vyr mỹ nĩm han ja tũ nĩn kỹ tóg há tũ nỹ.

³ Kỹ ùn kuprẽg nĩ gé, ag tỹ ãjag tỹ nén ù ma mũ jé, Jerusalém ra, ãjag tỹ tá ke fag mỹ nén ven sór mũ ti. Inh jun kỹ sóg ag jẽgnẽnh ke mũ, carta mré hã.

⁴ ãjag tỹ nén ù ẽn éhé nĩn kỹ sóg hẽn ri ke mũn ma tĩg sór mũ gé, kỹ sóg ag mré tĩg mũ gé.

Paulo tỹ nén han sór mũ

⁵ Kỹ tóg, isỹ ga tỹ Macedônia mĩ kutẽnh ken kỹ sóg vãhã ãjag tá jun sór mũ sir. Isỹ Macedônia mĩ kutẽ sór vẽ.

⁶ Hã ra sóg ãjag mré nĩg mág sĩ han sór mũ, ti tỹ inh mỹ ki króm ken kỹ. Hẽn ri ke mũn sóg prỹg kusa fĩn rãm ke mũ, ãjag mré nĩ ki, kỹ ãjag tóg sir inh jagãgtãn kenh ke mũ, isỹ kar hẽn ra tĩg ken kỹ.

⁷ Inh pi(jé) ãjag ve sĩ han sór mũ', hã ra sóg ver kutar nĩ, hã kỹ sóg kar hã ãjag venh tĩg sór mũ. Sỹ ãjag mré nĩ sór vẽ mỹr, ěg Senhor tỹ to há nĩn kỹ.

⁸ Ver sóg cidade tỹ Éfeso tag kã nĩ ki festa tỹ Pentecoste pétẽm sór mũ.

⁹ Tag ki ke ag tóg mẽ há han mũ, inh vĩ ti, ù tỹ hẽn ri ke ag. Hã ra tag ki ver ù tỹ inh kato vãsãnsãn mũ ag vỹ e nỹtĩ. Hã kỹ sóg Éfeso tag kã nĩg mág sĩ han sór mũ, sỹ kar ãjag venh tĩg jé.

¹⁰ Hẽn ri ke mũn Timóteo tóg ãjag ki jun ke mũ. Kỹ ti vĩ jẽmẽ há han nĩ, ti mỹ'ãg tũ nĩ jé, ti tỹ ãjag mré nĩn kỹ. Ëg Senhor rãnrãj han tóg tĩ mỹr, inh kóm.

¹¹ Kỹ ti to é he tũg nĩ, ti kyrũ hã ra. Kỹ ti tĩg ken kỹ ti jagãgtãn nĩ gé, ti tỹ jatun mỹ inh ki jun jé. Sỹ ti jãvãnh vẽ, ãg régre ag mré hã.

¹² Ëg régre tỹ Apolo mré sóg vẽmẽn gé. Ti mỹ sóg to vĩ mũ vẽ, ti tỹ ãjag venh tĩg jé, ãg régre tag ag mré hã, ù tỹ ãjag venh kãmũ tag ag mré. Hã ra tóg tĩg jãvãnh nĩ ver. Ti tỹ ti mỹ ki króm ken kỹ ti nẽji kejẽn ãjag venh tĩg ke mũ hã ra.

Jesus ki ge kỹ nỹtĩ ag tỹ jagnẽ mĩ êkrén

¹³ ãjag kanẽ fãn nĩ. Ëg Senhor ki rã tovãnh tũg nĩ. Krónh ke tũg nĩ, tar nỹtĩmnĩ.

¹⁴ Kỹ ãjag tỹ nén ù kar han kỹ vẽnũ kar to há nỹtĩmnĩ.

¹⁵ Kỹ sóg ãjag mỹ nén ù to vĩ sór mũ gé, Estéfanas to mỹr. Estéfanas fag vỹ Jesus ki ge vén ja nĩgtĩ, ãjag jamã tá, ga tỹ Grécia tag tá. Kỹ fag tóg Topẽ tũ fag ki rĩr nỹtĩgtĩ, Topẽ tũ fag kar ki.

¹⁶ Hã kỹ sóg fag tó mũ ãjag mỹ. Kỹ fag vĩ jẽmẽmnĩ. Kỹ Topẽ rãnrãj han mũ ag kar vĩ jẽmẽ kãn nĩ, ke gé, ãg mré rãnrãj mũ ag kar vĩ ti.

¹⁷ Estéfanas tóg inh ki jun há han, Fortunato ke gé, Acaico ke gé. Ag tỹ inh ki junjun kỹ inh fe tóg

mrin ke mũ mÿr. Sÿ ãjag venh há tĩn kÿ tóg inh mÿ sér pẽ tĩ, sÿ ag ve kÿ, ãjag jêgja kã ke vẽ mÿr, ag tÿ tÿ ãjag mré ke nÿtĩn kÿ.

¹⁸ Inh mÿ ag tóg vĩ há han mũ ãjag to, kÿ ag tóg inh krĩ kusãg mũ sir. Ag tÿ ãjag krĩ kusãg ke vẽ gé. Û tÿ ge to há tãvĩ nÿtĩmnĩ.

¹⁹ Ga tÿ Ásia tá igreja krêm vênhmãn tĩ ag vÿ ãjag mũ êkrég tĩ. Kÿ Áquila mré Priscila fag vÿ ãjag mũ êkrén mág tĩ gé, fag tÿ ãjag mré êg Senhor ki ge kÿ nÿtĩn kÿ. Fag ĩn krêm fag tóg culto han tĩ. Fag ĩn tá culto to kãmũ fag vÿ ãjag mũ êkrég tĩ gé,

²⁰ kar kÿ êg Senhor ki ge kÿ nÿtĩ fag kar ke gé. Jagnẽ to há tãvĩ nÿtĩmnĩ, kÿ jagnẽ ki nhun ke ri ke han nĩ, Jesus mré ke kar ki, ãjag tÿ jagnẽ nĩgê kãgmĩ kÿ.

²¹ Sÿ vãhã vêsóg ki ãjag mÿ rán vẽ, ù tÿ inh vĩ rán ja pãte, inh, hã vÿ: Paulo, he mũ.

²² Topẽ mÿ sóg to vĩ tĩ, ti tÿ ù tÿ êg Senhor to há tãvĩ tũ ên ag vóg kónãn kãn jé. “Marana tá,” he sóg tĩ, hã vÿ: ha kãtĩg, Senhor, he mũ, ãjag vĩ ki.

²³ Êg Senhor tÿ Jesus mÿ sóg to vĩ tĩ, ti tÿ ãjag tar han jé.

²⁴ ãjag jé isÿ ãjag to há tãvĩ nĩ ki kanhrãn, êg tÿ Jesus Cristo ki ge kÿ nÿtĩn kÿ.

Hã vẽ.

Topẽ vĩ rá **New Testament in Kaingang (BR:kgp:Kaingang)**

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022
16af52c8-0e45-5e91-b36c-cd314d36d7fc